

# 無量壽經優婆提舍願生偈註

婆藪槃豆造 菩提流支譯 沙門曇鸞註解



無量壽經優婆提舍願生偈

婆藪槃頭菩薩造

菩提流支譯

沙門曇鸞註解

序 .....	13
A01 總說分 .....	16
B01 解論名目 .....	16
B02 分偈章門 .....	17
C01 釋禮拜門、讚歎門、作願門 .....	18
C02 成優婆提舍名 .....	23
C03 成上三門起下二門 .....	24
C04 釋觀察門 .....	25

D01 觀察器世間莊嚴成就 .....	25
E01 觀總相 .....	26
E02 觀別相 .....	29
F01 莊嚴量功德成就 .....	29
F02 莊嚴性功德成就 .....	30
F03 莊嚴形相功德成就 .....	33
F04 莊嚴種種事功德成就 .....	34
F05 莊嚴妙色功德成就 .....	34
F06 莊嚴觸功德成就 .....	36
F07 莊嚴三種功德成就 .....	37

G01 莊嚴水功德成就 .....	38
G02 莊嚴地功德成就 .....	39
G03 莊嚴虛空功德成就 .....	40
F08 莊嚴雨功德成就 .....	40
F09 莊嚴光明功德成就 .....	42
F10 莊嚴妙聲功德成就 .....	42
F11 莊嚴主功德成就 .....	44
F12 莊嚴眷屬功德成就 .....	45
F13 莊嚴受用功德成就 .....	46
F14 莊嚴無諸難功德成就 .....	48

F15	莊嚴大義門功德成就 .....	49
F16	莊嚴一切所求滿足功德成就 .....	54
D02	觀察眾生世間莊嚴成就 .....	55
E01	觀察阿彌陀如來莊嚴功德 .....	55
F01	莊嚴座功德成就 .....	56
F02	莊嚴身業功德成就 .....	58
F03	莊嚴口業功德成就 .....	61
F04	莊嚴心業功德成就 .....	61
F05	莊嚴大眾功德成就 .....	62
F06	莊嚴上首功德成就 .....	63

F07 莊嚴主功德成就 .....	64
F08 莊嚴不虛作住持功德成就 .....	65
E02 觀察菩薩莊嚴功德成就 .....	66
F01 開諸眾生淤泥花 .....	67
F02 滅除一切眾生苦 .....	69
F03 供養恭敬讚歎諸佛如來功德 .....	70
F04 住持莊嚴佛法僧寶功德大海 .....	71
C05 釋迴向門 .....	72
A02 解義分 .....	79
B01 願偈大意 .....	80

B02 起觀生信 .....	80
C01 示五念力 .....	80
C02 出五念門 .....	80
D01 禮拜門 .....	81
D02 讚歎門 .....	82
D03 作願門 .....	85
D04 觀察門 .....	87
D05 迴向門 .....	88
B03 觀行體相 .....	89
C01 器體 .....	89

D01 國土體相 .....	89
E01 莊嚴清淨功德成就 .....	92
E02 莊嚴量功德成就 .....	93
E03 莊嚴性功德成就 .....	93
E04 莊嚴形相功德成就 .....	94
E05 莊嚴種種事功德成就 .....	94
E06 莊嚴妙色功德成就 .....	95
E07 莊嚴觸功德成就 .....	95
E08 莊嚴三種功德成就 .....	97
F01 莊嚴水功德成就 .....	97

F02 莊嚴地功德成就 .....	99
F03 莊嚴虛空功德成就 .....	101
E09 莊嚴雨功德成就 .....	102
E10 莊嚴光明功德成就 .....	103
E11 莊嚴妙聲功德成就 .....	103
E12 莊嚴主功德成就 .....	104
E13 莊嚴眷屬功德成就 .....	105
E14 莊嚴受用功德成就 .....	106
E15 莊嚴無諸難功德成就 .....	106
E16 莊嚴大義門功德成就 .....	107

E17 莊嚴一切所求滿足功德成就 .....	108
D02 示現自利利他 .....	109
D03 入第一義諦 .....	110
C02 眾生體 .....	115
D01 觀佛 .....	115
E01 莊嚴座功德成就 .....	116
E02 莊嚴身業功德成就 .....	117
E03 莊嚴口業功德成就 .....	117
E04 莊嚴心業功德成就 .....	117
E05 莊嚴眾功德成就 .....	120

E06	莊嚴上首功德成就 .....	120
E07	莊嚴主功德成就 .....	120
E08	莊嚴不虛作住持功德成就 .....	120
D02	觀菩薩 .....	126
E01	開諸眾生淤泥花 .....	127
E02	滅除一切眾生苦 .....	128
E03	供養恭敬讚歎諸佛如來功德 .....	129
E04	住持莊嚴佛法僧寶功德大海 .....	129
B04	淨入願心 .....	130
B05	善巧攝化 .....	134

B06	離菩提障	137
B07	順菩提門	139
B08	名義攝對	140
B09	願事成就	142
B10	利行滿足	143
C01	自利行	144
D01	近門	145
D02	大會眾門	145
D03	宅門	145
D04	屋門	146

C02 利他行 園林遊戲地門 .....	146
C03 速成佛道 .....	148

## 南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

## 無量壽經優婆提舍願生偈註

### 序

謹案龍樹菩薩《十住毘婆沙》云：菩薩求阿毘跋致，有二種道：①難行道，②易行道。

難行道者，謂於五濁之世，於無佛時，求阿毘跋致，為難。此難乃有多途，粗言五三，以示義意：

- ①外道相善，亂菩薩法；②聲聞自利，障大慈悲；③無顧惡人，破他勝德；  
④顛倒善果，能壞梵行；⑤唯是自力，無他力持。

如斯等事，觸目皆是。譬如陸路，步行則苦。

易行道者，謂但以信佛因緣，願生淨土，乘佛願力，便得往生彼清淨土。佛力住持，即入大乘正定之聚，正定聚即是阿毘跋致。譬如水路，乘船則樂。

此《無量壽經優婆提舍》，蓋上行之極致，不退之風航者也。

無量壽，是安樂淨土如來別號。釋迦牟尼佛在王舍城及舍衛國，於大眾之中說無量壽佛莊嚴功德，即以佛名號為經體。後聖者婆藪槃頭菩薩服膺如來大悲之教，傍經作願生偈，復造長行重釋。

梵言優婆提舍，此間無正名相譯。若舉一隅，可名為論。所以無正名，譯者

以此間本無佛故。如此間書，就孔子而稱經，餘人製作皆名為子。國史、國紀之徒，各別體例。

然，佛所說十二部經中，有論議經名優婆提舍。若復佛諸弟子解佛經教，與佛義相應者，佛亦許名優婆提舍，以入佛法相故。

此間云論，直是論議而已，豈得正譯彼名耶？又如女人，於子稱母，於兄云妹。如是等事，皆隨義名別。若但以女名，汎談母、妹，乃不失女人之大體，豈含尊卑之義乎！此所云論，亦復如是。是以仍存梵音，曰優婆提舍。

此論始終，凡有二重：①總說分，②解義分。

總說分者，前五言偈盡是。解義分者，論曰已下，長行盡是。

所以為二重者，有二義：偈以頌經，為總攝故。論以釋偈，為解義故。

## A01 總說分

有二：①解論名目，②分偈章門。

## B01 解論名目

無量壽經優婆提舍願生偈

無量壽者，言如來壽命長遠，不可思量也。

經者，常也。言安樂國土佛及菩薩清淨莊嚴功德、國土清淨莊嚴功德，能與眾生作大饒益，可常行于世，故名曰經。

優婆提舍，是佛論議經名。

願，是欲樂義。

生者，天親菩薩願生彼安樂淨土，如來淨花中生。故曰願生。

偈，是句數義。以五言句略頌佛經，故名為偈。

### 婆藪槃頭菩薩造

譯婆藪，云天。譯槃頭，言親。此人字天親，事在《付法藏經》。

菩薩者，若具存梵音，應言「菩提薩埵」。菩提者，是佛道名。薩埵，或云眾生，或云勇健。求佛道眾生，有勇猛健志，故名菩提薩埵。今但言菩薩，譯者略耳。

造，亦作也。庶因人重法，故云某造。

是故，言《無量壽經優婆提舍願生偈》，婆藪槃頭菩薩造。

### B02 分偈章門

偈中分為五念門，如下長行所釋。

第一行，四句偈，含有三念門。上三句是禮拜、讚歎門。下一句是作願門。

第二行，論主自述：「我依佛經造論，與佛教相應，所服有宗。」。何故云此？為成優婆提舍名故，亦是成上三門，起下二門，所以次之說。

從第三行，盡二十三行是觀察門。末後一行，是迴向門。

### C01 釋禮拜門、讚歎門、作願門

④ 世尊我一心 歸命盡十方 無礙光如來 願生安樂國

世尊者，諸佛通號。論智，則義無不達；語斷，則習氣無餘。智斷具足，能利世間，為世尊重，故曰世尊。

此言意歸釋迦如來。何以得知？下句言：我依修多羅。天親菩薩在釋迦如來像法之中，順釋迦如來經教，所以願生。願生有宗，故知此言歸于釋迦。

若謂此意，遍告諸佛，亦復無嫌。

夫菩薩歸佛，如孝子之歸父母，忠臣之歸君后。動靜非己，出沒必由。知恩報德，理宜先啟。

又，所願不輕，若如來不加威神，將何以達。乞加神力，所以仰告。

我一心者，天親菩薩自督之詞。言念無礙光如來，願生安樂國，心心相續，無他想間雜。

①問佛法中「無我」，此中何以稱「我」？

②答言「我」，有三根本：①邪見語，②自大語，③流布語。今言「我」者，天親菩薩自指之言，用流布語，非邪見、自大也。

歸命盡十方無礙光如來者。

歸命，即是禮拜門。盡十方無礙光如來，即是讚歎門。

何以知「歸命」是禮拜？龍樹菩薩造《阿彌陀如來讚》<sup>1</sup>中，言「歸命」，或言「稽首」，或言「頂禮」。此論，長行中亦言「修五念門」。五念門中，禮拜是一。天親菩薩既願往生，豈容不禮？故知「歸命」即是禮拜。然禮拜，但是恭敬，不必歸命，歸命必是禮拜。若以此推，歸命為重。

偈申己心，宜言歸命。論解偈義，汎談禮拜。彼此相成，於義彌顯。

何以知「盡十方無礙光如來」是讚歎門？下長行中言：云何讚歎？謂稱彼如來名，如彼如來光明智相，如彼名義，欲如實修行相應故。

---

<sup>1</sup> 十二禮。禪那囉多三藏別譯，龍樹菩薩讚禮阿彌陀佛文。

依舍衛國所說《無量壽佛經》，解阿彌陀如來名號：何故號阿彌陀？彼佛光明無量，照十方國，無所障礙，是故號阿彌陀。又，彼佛壽命及其人民，無量無邊阿僧祇劫，故名阿彌陀。

①問若言「無礙光如來光明無量照十方國土無所障礙」者，此間眾生，何以不蒙光照？光有所不照，豈非有礙耶？

②答礙屬眾生，非光礙也。譬如日光周四天下，而盲者不見，非日光不周也。亦如密雲洪霖，而頑石不潤，非雨不洽也。

若言一佛主領三千大千世界，是聲聞論中說。若言諸佛遍領十方無量無邊世界，是大乘論中說。

天親菩薩今言「盡十方無礙光如來」，即是依彼如來名，如彼如來光明智相

讚歎。故知此句是讚歎門。

願生安樂國者。此一句是作願門，天親菩薩歸命之意也。其安樂義，具在下觀察門中。

①問大乘經論中，處處說眾生畢竟無生如虛空，云何天親菩薩言願生耶？

②答說「眾生無生如虛空」，有二種：

①如凡夫所謂「實眾生」，如凡夫所見「實生死」。此所見事畢竟無所有，如龜毛，如虛空。

②謂諸法因緣生故，即是不生，無所有如虛空。

天親菩薩所願生者，是因緣義。因緣義故，假名「生」，非如凡夫謂有「實眾生」、「實生死」也。

⑩ 依何義說「往生」？

⑪ 於此間假名人中修五念門，前念與後念作因。穢土假名人，淨土假名人，不得決定一，不得決定異。前心後心，亦復如是。何以故？若一，則無因果。若異，則非相續。是義，《觀一異門論》<sup>2</sup> 中委曲。

## C02 成優婆提舍名

⑫ 我依修多羅 真實功德相 說願偈總持 與佛教相應

此一行云何成優婆提舍名？偈言：我依修多羅，與佛教相應。

修多羅是佛經名。我論佛經義，與經相應，以入佛法相故，得名優婆提舍。

---

<sup>2</sup> 龍樹菩薩造《十二門論》第六：即推有相無相，為在一法？為在異法？不一不異，以之為門

### C03 成上三門起下二門

云何成上三門起下二門？

我依者。何所依？何故依？云何依？

何所依者，依修多羅。何故依者，以如來即真實功德相故。云何依者？修五念門相應故。

修多羅者。十二部經中，直說者名修多羅，謂四阿含三藏等。三藏外大乘諸經，亦名修多羅。此中言依修多羅者，是三藏外大乘修多羅，非阿含等經也。

真實功德相者，有二種功德：

①從有漏心生，不順法性。所謂凡夫人天諸善、人天果報，若因若果，皆是顛倒，皆是虛偽，是故名「不實功德」。

②從菩薩智慧清淨業起，莊嚴佛事。依法性，入清淨相，是法不顛倒、不虛偽，名為「真實功德」。云何不顛倒？依法性、順二諦故。云何不虛偽？攝眾生入畢竟淨故。

說願偈總持，與佛教相應者。持，名不散不失。總，名以少攝多。偈，言五言句數。願，名欲樂往生。說，謂說諸偈論。總而言之，所說《願生偈》，總持佛經，與佛教相應。相應者，譬如函蓋相稱也。

## C04 釋觀察門

此門中分為二別：①觀察器世間莊嚴成就，②觀察眾生世間莊嚴成就。

### D01 觀察器世間莊嚴成就

觀器世間中，復分為十七別，至文當目。

有二：①觀總相，②觀別相。

## E01 觀總相

### ④ 觀彼世界相 勝過三界道

此句已下，至願生彼阿彌陀佛國，是觀器世間莊嚴成就。

此二句即是第一事，名為觀察莊嚴清淨功德成就，此清淨是總相。

佛本所以起此莊嚴清淨功德者，見三界是虛偽相，是輪轉相，是無窮相，如  
蛄蟻<sup>3</sup> 循環，如蠶繭自縛。哀哉！眾生締此三界，顛倒不淨。欲置眾生於不虛  
偽處，於不輪轉處，於不無窮處，得畢竟安樂大清淨處，是故起此清淨莊嚴功

---

<sup>3</sup> 蛄蟻的幼蟲，身體一屈一伸地前進。《大智度論卷十八》譬如蛄蟻，屈安後足，然後進前足；所緣盡，無復進處而還。

德也。

成就者，言此清淨不可破壞，不可污染；非如三界是污染相，是破壞相也。

觀者，觀察也。彼者，彼安樂國也。世界相者，彼安樂世界清淨相也，其相別在下。

勝過三界道。道者，通也。以如此因，得如此果。以如此果，酬如此因。通因至果，通果酬因，故名為道。三界者：

①欲界。所謂六欲天，四天下人、畜生，餓鬼，地獄等是也。

②色界。所謂初禪、二禪、三禪、四禪天等是也。

③無色界。所謂空處、識處、無所有處、非想非非想處天等是也。

此三界，蓋是生死凡夫流轉之閻宅。雖復苦樂小殊，修短暫異，統而觀之，

莫非有漏。

倚伏<sup>4</sup> 相乘，循環無際，雜生觸受，四倒長拘。且因且果，虛偽相襲。

安樂，是菩薩慈悲正觀之由生，如來神力本願之所建。胎卵濕生，緣茲高揖<sup>5</sup>；業繫長維<sup>6</sup>，從此永斷。續括之權<sup>7</sup>，不待勸而彎弓<sup>8</sup>。勞謙<sup>9</sup> 禪讓<sup>10</sup>，

---

4 《老子·五十八章》禍兮福所倚，福兮禍所伏。

5 雙手抱拳，高舉過頭作揖，辭謝告退之禮。喻不復有胎生、卵生、濕生，唯有淨土化生。

6 輪迴作業的維持與聯繫。

7 括，又作筈，箭的末端。《大般若經·卷452》：如有壯夫，善閑射術，欲顯己技，仰射虛空，為令空中箭不墮地，復以後箭射前箭筈，如是展轉，經於多時，箭箭相承，不令其墮。若欲令墮，便止後箭，爾時諸箭方頓墮落。權，權巧方便。

8 喻交情原友善，後反目成仇。《喻世明言》：朝兄弟，暮仇敵，才放下酒杯，出門便彎弓相向。

9 勤勞而謙虛。

10 禪讓(禪，音善)，讓位予賢人。喻能放下，將己所有，捐予他人。

齊普賢而同德。勝過三界，抑是近言<sup>11</sup>。

## E02 觀別相

有六：①莊嚴量功德成就，②莊嚴性功德成就，③莊嚴形相功德成就，④莊嚴種種事功德成就，⑤莊嚴妙色功德成就，⑥莊嚴觸功德成就。

## F01 莊嚴量功德成就

### ④ 究竟如虛空 廣大無邊際

佛本所以起此莊嚴量功德者，見三界狹小，墮陁陪陁<sup>12</sup>，或宮觀迫迮，或土田逼隘，或志求路促，或山河隔障，或國界分部，有如此等種種拘局事。

---

11 只可略言梗概，非言語所能盡述。

12 墮，坑塹。陁，山脈中斷的地方。陪，重疊的土堆。陁，渚也，水中的小洲。

是故，菩薩與此莊嚴量功德願：願我國土，如虛空，廣大無際。

如虛空者，言來生者雖眾，猶若無也。

廣大無際者，成上如虛空義。何故如虛空？以廣大無際故。

成就者，言十方眾生往生者，若已生，若今生，若當生，雖無量無邊，畢竟常如虛空，廣大無際，終無滿時。

是故言：究竟如虛空，廣大無邊際。

①問如維摩方丈，苞容有餘，何必國界無貲，乃稱廣大？

②答所言廣大，非必以畦畹為喻。但言如空，亦何累方丈。又，方丈之所苞容，在狹而廣。覈論果報，豈若在廣而廣耶！

F02 莊嚴性功德成就

④ 正道大慈悲 出世善根生

佛本何故起此莊嚴？見有國土，以愛欲故，則有欲界。以攀厭<sup>13</sup>禪定故，則有色、無色界。此三界，皆是有漏邪道所生，長寢大夢，莫知惺出。是故興大悲心：願我成佛，以無上正見道，起清淨土，出于三界。

性，是本義。言此淨土，隨順法性，不乖法本。事同《華嚴經》寶王如來性起義。

又，言積習成性，指法藏菩薩集諸波羅蜜，積習所成。

亦言性者，是聖種性，序法藏菩薩於世自在王佛所，悟無生法忍，爾時位名

---

13 攀緣上妙境，厭捨下劣境。

聖種性。於是性中，發四十八大願，修起此土，即曰安樂淨土，是彼因所得，果中說因，故名為性。

又，言性，是必然義、不改義。如海性一味，眾流入者，必為一味，海味不隨彼改也。

又，如人身，性不淨故，種種妙好色香美味入身，皆為不淨。安樂淨土，諸往生者，無不淨色，無不淨心，畢竟皆得清淨平等無為法身，以安樂國土清淨性成就故。

正道大慈悲，出世善根生者，平等大道也。

平等道所以名為正道者，平等是諸法體相。以諸法平等，故發心等；發心等故，道等；道等故，大慈悲等。大慈悲是佛道正因，故言正道大慈悲。

慈悲有三緣：①眾生緣，是小悲；②法緣，是中悲；③無緣，是大悲。大悲即是出世善也。安樂淨土，從此大悲生故。

故謂此大悲為淨土之根，故曰出世善根生。

### F03 莊嚴形相功德成就

#### ④ 淨光明滿足 如鏡日月輪

佛本所以起此莊嚴功德者，見日行四域，光不周三方。庭燎在宅<sup>14</sup>，明不滿十仞。以是故，起滿淨光明願，如日月光輪，滿足自體。彼安樂淨土，雖復廣大無邊，清淨光明，無不充塞。

---

14 庭中照明的火炬。

故曰：淨光明滿足，如鏡日月輪。

#### F04 莊嚴種種事功德成就

##### ④ 備諸珍寶性 具足妙莊嚴

佛本何故起此莊嚴？見有國土，以泥土為宮飾，以木石為華觀；或彫金鏤玉，意願不充；或營備百千，具受辛苦。以此故，興大悲心：願我成佛，必使珍寶具足，嚴麗自然，相忘於有餘，自得於佛道。此莊嚴事，縱使毘首羯磨工稱妙絕，積思竭想，豈能取圖。

性者，本義也。能生既淨，所生焉得不淨。故經言：隨其心淨，則佛土淨。

是故言：備諸珍寶性，具足妙莊嚴。

#### F05 莊嚴妙色功德成就

④ 無垢光焰熾 明淨曜世間

佛本何故起此莊嚴？見有國土，優劣不同。以不同故，高下以形。高下既形，是非以起。是非既起，長淪三有。是故興大悲心，起平等願：願我國土，光焰熾盛，第一無比，不如人天金色，能有奪者。若為相奪，如明鏡在金邊則不現。今日時中金，比佛在時金，則不現。佛在時金，比閻浮那金，則不現。閻浮那金，比大海中轉輪王道中金沙，則不現。轉輪王道中金沙，比金山，則不現。金山，比須彌山金，則不現。須彌山金，比三十三天瓔珞金，則不現。三十三天瓔珞金，比焰摩天金，則不現。焰摩天金，比兜率陀天金，則不現。兜率陀天金，比化自在天金，則不現。化自在天金，比他化自在天金，則不現。他化自在天金，比安樂國中光明，則不現。所以者何？彼土金光，從絕垢

業生故，清淨無不成就故。安樂淨土，是無生忍菩薩淨業所起，阿彌陀如來法王所領，阿彌陀如來為增上緣故。

是故言：無垢光焰熾，明淨曜世間。曜世間者，曜二種世間也。

## F06 莊嚴觸功德成就

④ 寶性功德草 柔軟左右旋 觸者生勝樂 過迦旃隣陀

佛本何故起此莊嚴？見有國土，雖寶重金玉，不得為衣服。雖珍玩明鏡，無議於敷具。斯緣悅於目，不便於身也。身眼二情，豈弗矛盾乎！是故願言：使我國土，人天六情，和於水乳，卒去楚越之勞。所以七寶柔軟，悅目便身。

迦旃隣陀<sup>15</sup>者，天竺柔軟草名也。觸之者，能生樂受，故以為喻。

註者<sup>16</sup>言：此間土石草木，各有定體。譯者<sup>17</sup>何緣目彼寶為草耶？當以其  
蘆，然蔡途故，以草目之耳。余若參譯，當別有途。

生勝樂者，觸迦旃隣陀，生染著樂。觸彼軟寶，生法喜樂。二事相懸，非勝  
如何！

是故言：寶性功德草，柔軟左右旋，觸者生勝樂，過迦旃隣陀。

## F07 莊嚴三種功德成就

---

15 《無量壽經記》：言迦旃隣陀者，此鳥名也。此鳥要輪王時方出，其羽柔軟。若輪王身不安時，來以羽摩身，身即安和。然淨土草過彼，故言過等也。

16 曇鸞大師自稱。

17 指菩提流支三藏。

有三：①莊嚴水，②莊嚴地，③莊嚴虛空。

## G01 莊嚴水功德成就

④ 寶花千萬種 彌覆池流泉 微風動花葉 交錯光亂轉

佛本何故起此願？見有國土，或湮溺洪濤，滓沫驚人；或凝澌決凜<sup>18</sup>，蹙枷懷怵<sup>19</sup>，向無安悅之情，背有恐值之慮。菩薩見此，興大悲心：願我成佛，所有流泉池沼，與宮殿相稱。種種寶花，布為水飾。微風徐扇，映發有序。開神悅體，無一不可。

是故言：寶花千萬種，彌覆池流泉，微風動花葉，交錯光亂轉。

---

18 凝，水結冰。澌，冰化水。決凜，冰凍相著，水流動。

19 蹙，緊迫。怵，失常。

## G02 莊嚴地功德成就

⑧ 宮殿諸樓閣 觀十方無礙 雜樹異光色 寶欄遍圍繞

佛本何故起此莊嚴？見有國土，嶠嶢峻嶺<sup>20</sup>，枯木橫岑<sup>21</sup>，峩峩崕嶙<sup>22</sup>，苒茅盈壑<sup>23</sup>。茫茫滄海，為絕目之川。蕩蕩廣澤，為無蹤之所。菩薩見此，興大悲願：願我國土，地平如掌；宮殿樓閣，鏡納十方。的無所屬，亦非不屬。寶樹寶欄互為映飾。

---

20 嶠嶢，高山。峻嶺，連綿的高山。

21 小而高的山。

22 峩，音昨，山高貌。嶩，山勢高大。嶕，陁也，山中絕處。嶙，山崖重深。

23 亂草充滿谷溝。

是故言：宮殿諸樓閣，觀十方無礙，雜樹異光色，寶欄遍圍繞。

### G03 莊嚴虛空功德成就

④ 無量寶交絡 羅網遍虛空 種種鈴發響 宣吐妙法音

佛本何故起此莊嚴？見有國土，煙雲塵霧，蔽障太虛。震烈霹霍，從上而墮。不祥裁霓，每自空來。憂慮百端，為之毛豎。菩薩見此，興大悲心：願我國土，寶網交絡，羅遍虛空，鈴鐸宮商，鳴宣道法。視之無厭，懷道見德。

是故言：無量寶交絡，羅網遍虛空，種種鈴發響，宣吐妙法音。

### F08 莊嚴雨功德成就

④ 雨花衣莊嚴 無量香普薰

佛本何故與此莊嚴？見有國土，欲以服飾布地延請所尊，或欲以香花名寶用

表恭敬，而業貧感薄，是事不果。是故，興大悲願：願我國土，常雨此物，滿眾生意。

何故以雨為言，恐取者云：若常雨花衣，亦應填塞虛空，何緣不妨？是故以雨為喻。

雨適時，則無洪滔之患。安樂報，豈有累情之物乎？

經<sup>24</sup>言：日夜六時，雨寶衣、雨寶花。寶質柔軟，履踐其上，則下四寸。隨舉足時，還復如故。用訖入寶地，如水入坎。

是故言：雨花衣莊嚴，無量香普薰。

---

24 《無量壽經》。

## F09 莊嚴光明功德成就

### ④ 佛慧明淨日 除世癡闇冥

佛本何故興此莊嚴？見有國土，雖復項背日光，而為愚癡所闇。是故願言：使我國土，所有光明，能除癡闇，入佛智慧，不為無記之事。亦云：安樂國土光明，從如來智慧報起，故能除世闇冥。經<sup>25</sup>言：或有佛土，以光明為佛事。即是此也。

故言：佛慧明淨日，除世癡闇冥。

## F10 莊嚴妙聲功德成就

---

25 《維摩經·香積佛品》。

④ 梵聲悟深遠 微妙聞十方

佛本何故與此願？見有國土，雖有善法，而名聲不遠。有名聲雖遠，復不微妙。有名聲妙遠，復不能悟物。是故起此莊嚴。

天竺國稱淨行為梵行，稱妙辭為梵言。彼國貴重梵天，多以梵為讚。亦言中國法與梵天通故也。

聲者，名也，名謂安樂土名。經言：若人但聞安樂淨土之名，欲願往生，亦得如願，此名悟物之證也。

釋論<sup>26</sup>言：如斯淨土，非三界所攝。何以言之？無欲故，非欲界；地居故，

---

26 《大智度論》，解釋《摩訶若波羅蜜經》之論。

非色界；有色故，非無色界。蓋菩薩別業所致耳。出有<sup>27</sup>而有<sup>28</sup>，曰微；名能開悟，曰妙<sup>29</sup>。

是故言：梵聲悟深遠，微妙聞十方。

## F11 莊嚴主功德成就

### ④ 正覺阿彌陀 法王善住持

佛本何故與此願？見有國土，羅剎為君，則率土相啖。寶輪駐殿，則四域無

---

27 出有者，謂出三有。

28 而有者，謂淨土有也。

29 妙，好也。以名能悟物，故稱妙。

虞。譬之風靡<sup>30</sup>，豈無本耶？是故興願：願我國土，常有法王，法王善力之所住持。

住持者，如黃鵠持子安，千齡更起；魚母念持魚子，經鬻不壞<sup>31</sup>。安樂國為正覺善持，其國豈有非正覺事耶？

是故言：正覺阿彌陀，法王善住持。

## F12 莊嚴眷屬功德成就

④ 如來淨花眾 正覺花化生

---

30 隨風傾倒，比如服從或流行。

31 黃鵠報恩，在子安墳前呼念子安之名，子安得以復活。魚母持念魚子，經過無水季節，亦不爛壞。夏有水，冬無水，曰鬻。《大智度論·卷79》：菩薩不為諸佛所念者，則善根朽壞。如魚子不為母念，則爛壞不生。

佛本何故與此願？見有國土，或以胞血為身器，或以糞尿為生元。或槐棘高圻，出猜狂之子<sup>32</sup>。或豎子婢腹，出卓犖之才<sup>33</sup>。譏誚猶之懷火，恥辱緣以抱冰<sup>34</sup>。所以願言：使我國土，悉於如來淨花中生，眷屬平等，與奪無路。

故言：如來淨花眾，正覺花化生。

### F13 莊嚴受用功德成就

#### ④ 愛樂佛法味 禪三昧為食

---

32 槐棘，三公九卿之位。圻，封地千里。但生育殘暴無情，任性放蕩之子。

33 父母為愚弱卑微之人，而生育卓越才子。

34 喻言雖為天才，但出身卑微，受人譏誚，猶如夏天握火，煩熱之至。雖門庭高貴，但子孫不賢，受人指責，倍感恥辱。《吳越春秋·勾踐歸國外傳》：冬常抱冰，夏還握火，愁心苦志，懸膽于戶，出入嘗之。

佛本何故與此願？見有國土，或採巢破卵，為饑饒之膳<sup>35</sup>；或懸沙指帛，為相慰之方<sup>36</sup>。嗚呼！諸子實可痛心。是故與大悲願：願我國土，以佛法，以禪定，以三昧為食，永絕他食之勞。

愛樂佛法味者，如日月燈明佛說法華經六十小劫，時會聽者，亦坐一處，六十小劫，謂如食頃。無有一人，若身若心，而生懈倦。

以禪定為食者，謂諸大菩薩，常在三昧，無他食也。三昧者，彼諸人天，若須食時，百味嘉餚羅列在前。眼見色，鼻聞香，身受適悅，自然飽足。訖已，

---

35 家境窮困，採巢取卵，辦作美食，盛滿器皿，自誇豐盛。

36 家境窮困，以沙石裝在布袋裏，安慰說袋裝有糧食。《俱舍論·卷10》：世傳有言：昔有一父，時遭飢饉，欲造他方。自既飢羸，二子嬰稚，意欲攜去，力所不任。以囊盛灰，挂於壁上。慰喻二子云是麩囊。二子希望，多時延命。後有人至，取囊為開。子見是灰，望絕便死。

化去。若須，復現。其事在經<sup>37</sup>。

是故言：愛樂佛法味，禪三昧為食。

## F14 莊嚴無諸難功德成就

### ④ 永離身心惱 受樂常無間

佛本何故興此願？見有國土，或朝預袞寵，夕惶斧鉞<sup>38</sup>；或幼捨蓬藜，長列方丈<sup>39</sup>；或鳴笳道出，歷經催還<sup>40</sup>。有如是等種種違奪。是故願言：使我國

---

37 《無量壽經》。

38 朝賜袞衣以示嘉獎，夕給斧鉞以示懲罰，終日惶恐。

39 期得如意美好環境。蓬藜，所食粗劣飯菜。方丈，相傳渤海中仙人居住的山。《列子·湯問》：其中有五山焉：一曰岱輿，二曰員嶠，三曰方壺，四曰瀛洲，五曰蓬萊。方壺，又名方丈。喻人獲得殊榮，如入仙境。

40 笳角，又名號角。喻滿懷壯志，領兵出征，以期戰功，但為朝廷連連催促收兵，事與願違。

土，安樂相續，畢竟無間。

身惱者，飢渴寒熱殺害等也。心惱者，是非得失、三毒等也。

是故言：永離身心惱，受樂常無間。

### F15 莊嚴大義門功德成就

④ 大乘善根界 等無譏嫌名 女人及根缺 二乘種不生

門者，通大義之門也。大義者，大乘所以也。如人造城，得門則入。若人得生安樂國者，是則成就大乘之門也。

佛本何故與此願？見有國土，雖有佛如來賢聖等眾，由國濁故，分一說三。

或以拓眉致誚<sup>41</sup>，或緣指語招譏<sup>42</sup>。是故願言：使我國土，皆是大乘一味，平等一味。根敗種子，畢竟不生。女人、殘缺，名字亦斷。

是故言：大乘善根界，等無譏嫌名，女人及根缺，二乘種不生。

④案王舍城所說《無量壽經》，法藏菩薩四十八願中，言：設我得佛，國中聲聞，有能計量知其數者，不取正覺。是有聲聞，一證也。

又，《十住毘婆沙》中，龍樹菩薩造《阿彌陀讚》云：超出三界獄，目如蓮花葉，聲聞眾無量，是故稽首禮。是有聲聞，二證也。

---

41 拓，音tà塔。實相無相，先以權巧方便顯示為三乘；後廢權顯實，唯說一乘。前後不一而致譏誚。

42 實義中，離語言分別，無諍好惡、罪福、虛實，故語以得義，義非語也。如人以指指月以示惑者，惑者視指而不視月，人語之言：「我以指指月，令汝知之，汝何看指而不視月？」此亦如是，語為義指，語非義也。惑者視指不見月而致譏故，是以不應依語，應依義也。

又，《摩訶衍論》中言：佛土種種不同，或有佛土純是聲聞僧，或有佛土純是菩薩僧，或有佛土菩薩聲聞會為僧，如阿彌陀安樂國等是也。是有聲聞，三證也。

諸經中有說安樂國處，多言有聲聞，不言無聲聞。聲聞，即是二乘之一。

《論》言「乃至無二乘名」，此云何會？

⑧以理推之，安樂淨土不應有二乘。何以言之？夫有病則有藥，理數之常也。

《法華經》言：「釋迦牟尼如來，以出五濁世故，分一為三。」淨土既非五濁，無三乘明矣。

《法華經》道諸聲聞：「是人於何而得解脫？但離虛妄，名為解脫。是人實未得一切解脫，以未得無上道故。」核推此理，阿羅漢既未得一切解脫，必

應有生。此人更不生三界，三界外除淨土，更無生處，是以唯應於淨土生。如言聲聞者，是他方聲聞來生，仍本名故，稱為聲聞。如天帝釋生人中時，姓憍尸迦，後雖為天主，佛欲使人知其由來，與帝釋語時，猶稱憍尸迦。其此類也。

又，此論但言：「二乘種不生」，謂安樂國不生二乘種子，亦何妨二乘來生耶？譬如橘栽，不生江北。河洛果肆，亦見有橘。又言鸚鵡不渡壟西，趙魏架桁亦有鸚鵡。此二物，但言其種不渡。彼有聲聞亦如是。作如是解，經論則會。

⑩以名召事，有事乃有名。安樂國既無二乘、女人、根缺之事，亦何須復言無此三名耶？

④答如軟心菩薩，不甚勇猛，譏言「聲聞」。

如人諂曲，或復懦弱，譏言「女人」。

又，如眼雖明，而不識事，譏言「盲人」。

又，如耳雖聽，而聽義不解，譏言「聾人」。

又，如舌雖語，而訥口謇吃，譏言「瘖人」。

有如是等，根雖具足，而有譏嫌之名。是故須言「乃至無名」，明淨土無如是等與奪之名。

④問尋法藏菩薩本願及龍樹菩薩所讚，皆似以彼國聲聞眾多為奇。此有何義？

④答聲聞以實際為證，計不應更能生佛道根芽。而佛以本願不可思議神力攝令生

彼，必當復以神力生其無上道心。譬如鳩鳥入水，魚蚌咸死<sup>43</sup>；犀牛觸之，死者皆活<sup>44</sup>。如此不應生而生，所以可奇。然五不思議中，佛法最不可思議。佛能使聲聞復生無上道心，真不可思議之至也。

## F16 莊嚴一切所求滿足功德成就

### ④ 眾生所願樂 一切能滿足

佛本何故與此願？見有國土，或名高位重，潛處無由。或人凡性鄙，悒出靡路。或修短繫業，制不在己。如阿私陀仙人類也。有如是等，為業風所吹，不得自在。是故願言：使我國土，各稱所求，滿足情願。

---

43 鳩鳥的羽毛有劇毒，入水則令水有毒。

44 犀牛角有解毒之功效。

是故言：眾生所願樂，一切能滿足。

⑧ 是故願生彼 阿彌陀佛國

結成上觀察十七種莊嚴國土成就，所以願生。

釋器世間清淨，訖之于上。

## D02 觀察眾生世間莊嚴成就

次觀眾生世間清淨。此門中分為二別：①觀察阿彌陀如來莊嚴功德，②觀察彼諸菩薩莊嚴功德。

## E01 觀察阿彌陀如來莊嚴功德

觀察如來莊嚴功德中，有八種，至文當目。

⑩有論師汎解「眾生」名義，以其輪轉三有，受眾多生死，故名「眾生」。今

名佛菩薩為「眾生」，是義云何？

⑧ 《大般涅槃經·迦葉品》言：一法有無量名，一名有無量義。

如以受眾多生死，故名為眾生者，此是小乘法釋三界中眾生名義，非大乘法眾生名義也。

大乘法所言眾生者，如《不增不減經》言：言眾生者，即是不生不滅義。何以故？若有生，生已復生，有無窮過故。有不生而生過故，是故無生。若有生，可有滅。既無生，何得有滅。是故無生無滅，是眾生義。

如《維摩詰經》中言：洞達五受陰，空無所起，是苦義。斯其類也。

## F01 莊嚴座功德成就

⑧ 無量大寶王 微妙淨花臺

佛本何故莊嚴此座？見有菩薩，於末後身，敷草而坐，成阿耨多羅三藐三菩提。人天見者，不生增上信、增上恭敬、增上愛樂、增上修行。是故願言：我成佛時，使無量大寶王，微妙淨花臺，以為佛座。

無量者，如《觀無量壽經》言：七寶地上，有大寶蓮花王座。蓮花一一葉，作百寶色，有八萬四千脈，猶如天畫。脈有八萬四千光，花葉小者，縱廣二百五十由旬。如是花，有八萬四千葉。一一葉間，有百億摩尼珠王以為映飾。一一摩尼放千光明，其光如蓋，七寶合成，遍覆地上，釋迦毘楞伽寶以為其臺。此蓮花臺，八萬金剛甄叔迦寶、梵摩尼寶、妙真珠網，以為嚴飾。於其臺上，自然而有四柱寶幢。一一寶幢，如百千萬億須彌山。幢上寶幔，如夜摩天宮，有五百億微妙寶珠以為映飾。一一寶珠，有八萬四千光。一一光，作八萬四千

異種金色。一一金色，遍安樂寶土，處處變化，各作異相。或為金剛臺，或作真珠網，或作雜花雲，於十方面隨意變現，化作佛事。如是等事，出過數量。是故言：無量大寶王，微妙淨花臺。

## F02 莊嚴身業功德成就

### ④ 相好光一尋 色像超群生

佛本何故莊嚴如此身業？見有佛身，受一丈光明，於人身光，不甚超絕。如轉輪王，相好亦大同。提婆達多，所減唯二，致令阿闍世王以茲惑亂。刪闍耶等敢如螳螂<sup>45</sup>。或如此類也。是故莊嚴如此身業。

---

45 螳螂擋車，不自量力。

案此間詰訓，六尺曰尋。如《觀無量壽經》言：阿彌陀如來，身高六十萬億那由他恒河沙由旬，佛圓光如百億三千大千世界。譯者以尋而言，何其晦乎！里舍間人，不簡縱橫長短，咸謂橫舒兩手臂為尋。若譯者或取此類，用準阿彌陀如來舒臂為言故稱一尋者，圓光亦應徑六十萬億那由他恒河沙由旬。

是故言：相好光一尋，色像超群生。

⑩《觀無量壽經》言：諸佛如來是法界身，入一切眾生心想中。是故汝等心想佛時，是心即是三十二相八十隨形好。是心作佛，是心是佛。諸佛正遍知海從心想生。是義云何？

⑪身，名集成。界，名事別。如眼界，緣根、色、空、明、作意，五因緣生，名為眼界。是眼，但自行己緣，不行他緣，以事別故。耳鼻等界亦如是。

言諸佛如來是法界身者，法界是眾生心法也。以心能生世間、出世間一切諸法，故名心為法界。法界能生諸如來相好身，亦如色等能生眼識。是故佛身名法界身。是身不行他緣，是故入一切眾生心想中。

心想佛時，是心即是三十二相八十隨形好者，當眾生心想佛時，佛身相好，顯現眾生心中也。譬如水清，則色像現。水之與像，不一不異。故言佛相好身，即是心想也。

是心作佛者，言心能作佛也。是心是佛者，心外無佛也。譬如火從木出，火不得離木也。以不離木故，則能燒木。木為火燒，木即為火也。

諸佛正遍知海從心想生者。正遍知者，真正如法界而知也。法界無相，故諸佛無知也。以無知故，無不知也。無知而知者，是正遍知也。是知深廣，不

可測量，故譬海也。

### F03 莊嚴口業功德成就

④ 如來微妙聲 梵響聞十方

佛本何故與此莊嚴？見有如來，名似不尊。如外道耆人<sup>46</sup>，稱瞿曇姓。成道日聲，唯徹梵天。是故願言：使我成佛，妙聲遐布，聞者悟忍。是故言：如來微妙聲，梵響聞十方。

### F04 莊嚴心業功德成就

④ 同地水火風 虛空無分別

---

46 推車人。

佛本何故與此莊嚴？見有如來說法云：此黑此白此不黑不白，下法中法上法上上法，有如是等無量差別品，似有分別。是故願言：使我成佛，如地荷負，無輕重之殊，如水潤長，無菴菹<sup>47</sup>之異。如火成熟，無芳臭之別。如風起發，無眠寤之差。如空苞受，無開塞之念。得之于內，物安於外，虛往實歸，於是于息。

是故言：同地水火風，虛空無分別。

## F05 莊嚴大眾功德成就

④ 天人不動眾 清淨智海生

---

47 菴，惡草。菹，瑞草。

佛本何故起此莊嚴？見有如來，說法輪下，所有大眾諸根性欲，種種不同。於佛智慧，若退若沒，以不等故，眾不純淨。所以興願：願我成佛，所有天人皆從如來智慧清淨海生。

海者，言佛一切種智，深廣無涯，不宿二乘雜善中下死屍，喻之如海。

是故言：天人不動眾，清淨智海生。

不動者，言彼天人成就大乘根，不可傾動也。

## F06 莊嚴上首功德成就

### ④ 如須彌山王 勝妙無過者

佛本何故起此願？見有如來眾中，或有強梁者，如提婆達多流比。或有國王與佛並治，不知甚推佛。或有請佛，以他緣廢忘。有如是等，似上首，力不成

就。是故願言：我為佛時，願一切大眾，無能生心，敢與我等。唯一法王，更無俗王。

是故言：如須彌山王，勝妙無過者。

## F07 莊嚴主功德成就

### ⑧ 天人丈夫眾 恭敬繞瞻仰

佛本何故起此莊嚴？見有佛如來，雖有大眾，眾中亦有不甚恭敬。

如一比丘語釋迦牟尼佛：若不與我解十四難，我當更學餘道。

亦如居迦離謗舍利弗，佛三語而三不受。

又，如諸外道輩，假入佛眾，而常伺求佛短。

又，如第六天魔，常於佛所，作諸留難。

有如是等種種不恭敬相，是故願言：使我成佛，天人大眾，恭敬無倦。

所以但言天人者，淨土無女人及八部鬼神故也。

是故言：天人丈夫眾，恭敬繞瞻仰。

### F08 莊嚴不虛作住持功德成就

⑧ 觀佛本願力 遇無空過者 能令速滿足 功德大寶海

佛本何故起此莊嚴？見有如來，但以聲聞為僧，無求佛道者。

或有值佛，而不免三途。善星、提婆、遮多、居迦離等是也。

又，人聞佛名號，發無上道心；遇惡因緣，退入聲聞辟支佛地者。

有如是等空過者、退沒者，是故願言：使我成佛時，值遇我者，皆速疾滿足無上大寶。

是故言：觀佛本願力，遇無空過者，能令速滿足，功德大寶海。

住持，義如上。

觀佛莊嚴八種功德，訖之于上。

## E02 觀察菩薩莊嚴功德成就

次觀安樂國諸大菩薩四種莊嚴功德成就。

①問觀如來莊嚴功德，何所闕少，復須觀菩薩功德耶？

②答如有明君，則有賢臣。堯舜之稱無為，是其比也。

若便但有如來法王，而無大菩薩法臣，於翼讚道，豈足云滿？

亦如薪積小，則火不大。如《無量壽經》言：阿彌陀佛國有無量無邊諸大菩薩，如觀世音、大勢至等。皆當一生，於他方次補佛處。

若人稱名憶念者，歸依者，觀察者，如《法華經·普門品》說：無願不滿。然菩薩愛樂功德，如海吞流，無止足情。

亦如釋迦牟尼如來，聞一目闍比丘呬言：「誰愛功德，為我維鍼。」爾時如來從禪定起，來到其所，語言：「我愛福德」。遂為其維鍼。爾時，失明比丘暗聞佛語聲，驚喜交集，白佛言：「世尊！世尊功德，猶未滿耶？」佛報言：「我功德圓滿，無所復須。但我此身從功德生，知功德恩分故，是故言愛。」

如所問觀佛功德，實無願不充。所以復觀菩薩功德者，有如上種種義故耳。

## F01 開諸眾生淤泥花

⑧ 安樂國清淨 常轉無垢輪 化佛菩薩日 如須彌住持

佛本何故起此莊嚴？見有佛土，但是小菩薩，不能於十方世界廣作佛事。

或但聲聞人天，所利狹小。

是故興願：願我國中有無量大菩薩眾，不動本處，遍至十方，種種應化，如實修行，常作佛事。

譬如日在天上，而影現百川。日豈來耶？豈不來耶？

如《大集經》言：譬如有人，善治堤塘，量其所宜，及放水時，不加心力。菩薩亦如是，先治一切諸佛及眾生應供養，應教化種種堤塘，及入三昧，身心不動，如實修行，常作佛事。

如實修行者，雖常修行，實無所修行也。

是故言：安樂國清淨，常轉無垢輪，化佛菩薩日，如須彌住持。

## F02 滅除一切眾生苦

⑧ 無垢莊嚴光 一念及一時 普照諸佛會 利益諸群生

佛本何故起此莊嚴？見有如來眷屬，欲供養他方無量諸佛，或欲教化無量眾生，此沒彼出，先南後北，不能以一念一時放光普照，遍至十方世界教化眾生，有出沒前後相故。

是故興願：願我佛土諸大菩薩，於一念時頃，遍至十方，作種種佛事。

是故言：無垢莊嚴光，一念及一時，普照諸佛會，利益諸群生。

⑨ 上章云「身不動搖，而遍至十方。」不動而至，豈非是一時義耶？與此若為差別？

⑩ 上但言「不動而至」，或容有前後。此言「無前無後」，是為差別，亦是成

上不動義。若不一時，則是往來。若有往來，則非不動。是故為成上不動義故，須觀一時。

### F03 供養恭敬讚歎諸佛如來功德

⑧ 雨天樂花衣 妙香等供養 讚諸佛功德 無有分別心

佛本何故起此莊嚴？見有佛土，菩薩人天，志趣不廣，不能遍至十方無窮世界，供養諸佛如來大眾。

或以己土穢濁，不敢向詣淨鄉。

或以所居清淨，鄙薄穢土。

以如此等種種局分，於諸佛如來所，不能周遍供養，發起廣大善根。

是故願言：我成佛時，願我國土一切菩薩聲聞天人大眾，遍至十方一切諸佛

大會處所，雨天樂、天花、天衣、天香，以巧妙辨辭，供養讚歎諸佛功德。

雖歎穢土如來大慈謙忍，不見佛土有雜穢相。雖歎淨土如來無量莊嚴，不見佛土有清淨相。何以故？以諸法等故，諸如來等。是故諸佛如來名為等覺。

若於佛土起優劣心，假使供養如來，非法供養也。

是故言：雨天樂花衣妙香等供養，讚諸佛功德，無有分別心。

#### F04 住持莊嚴佛法僧寶功德大海

④ 何等世界無 佛法功德寶 我願皆往生 示佛法如佛

佛本何故起此願？見有軟心菩薩，但樂有佛國土修行，無慈悲堅牢心。

是故興願：願我成佛時，我土菩薩皆慈悲勇猛，堅固志願，能捨清淨土，至他方無佛法僧處，住持莊嚴佛法僧寶。示如有佛，使佛種處處不斷。

是故言：何等世界無佛法功德寶，我願皆往生，示佛法如佛。

觀菩薩四種莊嚴功德成就，訖之于上。

### C05 釋迴向門

④ 我作論說偈 願見彌陀佛 普共諸眾生 往生安樂國

此四句，是論主迴向門。

迴向者，迴己功德，普施眾生，共見阿彌陀如來，生安樂國。

無量壽修多羅章句，我以偈頌總說竟。

⑤ 天親菩薩迴向章中，言普共諸眾生往生安樂國，此指共何等眾生耶？

⑥ 案王舍城所說《無量壽經》，佛告阿難：十方恒河沙諸佛如來，皆共稱嘆無量壽佛威神功德不可思議。諸有眾生聞其名號，信心歡喜，乃至一念，至心

迴向，願生彼國，即得往生，住不退轉，唯除五逆、誹謗正法。案此而言，一切外凡夫人，皆得往生。

又，如《觀無量壽經》有九品往生。下品下生者，或有眾生作不善業，五逆十惡，具諸不善，如此愚人，以惡業故，應墮惡道，經歷多劫受苦無窮。如此愚人，臨命終時，遇善知識，種種安慰為說妙法，教令念佛。此人苦逼，不遑念佛。善友告言：汝若不能念者，應稱「無量壽佛」。如是至心，令聲不絕。具足十念，稱「南無無量壽佛」。稱佛名故，於念念中，除八十億劫生死之罪。命終之後，見金蓮花，猶如日輪，住其人前。如一念頃，即得往生極樂世界。於蓮花中，滿十二大劫，蓮花方開。（當以此償五逆罪也）。觀世音、大勢至，以大悲音聲，為其廣說諸法實相除滅罪法。聞已歡喜，應

時則發菩提之心，是名下品下生者。以此經證，明知下品凡夫，但令不誹謗正法，信佛因緣皆得往生。

⑩《無量壽經》言：願往生者，皆得往生，唯除五逆、誹謗正法。《觀無量壽經》言：作五逆十惡，具諸不善，亦得往生。此二經云何會？

⑪一經以具二種重罪：①五逆，②誹謗正法。以此二種罪故，所以不得往生。一經但言「作十惡五逆等罪」，不言「誹謗正法」。以不謗正法故，是故得生。

⑫假使一人，具五逆罪，而不誹謗正法，經許得生。復有一人，但誹謗正法，而無五逆諸罪，願往生者，得生以不？

⑬但令誹謗正法，雖更無餘罪，必不得生。何以言之？經言：五逆罪人墮阿鼻

大地獄中，具受一劫重罪。誹謗正法人，墮阿鼻大地獄中。此劫若盡，復轉至他方阿鼻大地獄中，如是展轉，經百千阿鼻大地獄，佛不記得出時節。以誹謗正法，罪極重故。

又，正法者，即是佛法。此愚癡人，既生誹謗，安有願生佛土之理。假使但貪彼土安樂而願生者，亦如求非水之冰，無煙之火，豈有得理！

①問何等相是誹謗正法？

②答若言無佛、無佛法、無菩薩、無菩薩法。如是等見，若心自解，若從他受，其心決定，皆名誹謗正法。

③問如是等計，但是己事。於眾生有何苦惱，踰於五逆重罪耶？

④答若無諸佛菩薩說世間出世間善道教化眾生者，豈知有仁義禮智信耶？如是世

間一切善法皆斷，出世間一切賢聖皆滅。汝但知五逆罪為重，而不知五逆罪從無正法生。是故謗正法人，其罪最重。

⑩《業道經》言：業道如秤，重者先牽。

如《觀無量壽經》言：有人造五逆十惡，具諸不善，應墮惡道，經歷多劫，受無量苦。臨命終時，遇善知識，教稱「南無無量壽佛」。如是至心，令聲不絕，具足十念，便得往生安樂淨土，即入大乘正定之聚，畢竟不退，與三途諸苦永隔。先牽之義，於理如何？

又，曠劫已來，備造諸行，有漏之法，繫屬三界。但以十念念阿彌陀佛，便出三界，繫業之義，復欲云何？

⑪汝謂五逆十惡，繫業等為重；以下下品人，十念為輕，應為罪所牽，先墮地

獄繫在三界者。今當以義，校量輕重之義。在心、在緣、在決定，不在時節久近多少也。

云何在心？彼造罪人，自依止虛妄、顛倒見生。此十念者，依善知識，方便安慰，聞實相法生。一實一虛，豈得相比。譬如千歲闇室，光若暫至，即便明朗。豈得言闇在室千歲，而不去耶？是名在心。

云何在緣？彼造罪人，自依止妄想心，依煩惱虛妄果報眾生。此十念者，依止無上信心，依阿彌陀如來方便莊嚴真實清淨無量功德名號生。譬如有人被毒箭所中，截筋破骨，聞滅除藥鼓，即箭出毒除<sup>48</sup>。豈可得言「彼箭深毒

---

48 《首楞嚴經》言：譬如有藥，名曰滅除。若鬥戰時，用以塗鼓，聞鼓聲者，箭出毒除。菩薩摩訶薩亦復如是，住首楞嚴三昧，聞其名者，三毒之箭，自然拔出。

厲，聞鼓音聲，不能拔箭去毒。」耶？是名在緣。

云何在決定？彼造罪人，依止有後心，有間心生。此十念者，依止無後心，無間心生。是名決定。

校量三義：十念者重，重者先牽，能出三有，兩經一義耳。

⑩幾時名為一念。

⑪百一生滅，名一剎那。六十剎那，名為一念。此中云念者，不取此時節也。

但言憶念阿彌陀佛，若總相，若別相。隨所觀緣，心無他想，十念相續，名為十念。但稱名號亦復如是。

⑫心若他緣，攝之令還，可知念之多少，但知多少，復非無間。若凝心注想，復依何可得記念之多少。

⑩經言十念者，明業事成辦耳，不必須知頭數也。如言螻蛄不識春秋，伊蟲豈知朱陽之節乎。知者，言之耳。十念業成者，是亦通神者言之耳。但積念相續，不緣他事便罷，復何暇須知念之頭數也。若必須知，亦有方便。必須口授，不得題之筆點。

## A02 解義分

論曰已下，此是解義分。

此分中義，有十重：①願偈大意，②起觀生信，③觀行體相，④淨入願心，⑤善巧攝化，⑥離菩提障，⑦順菩提門，⑧名義攝對，⑨願事成就，⑩利行滿足。

論者，議也，言議偈所以也。曰者，詞也，指下諸句是議釋偈詞也。故言論

曰。

## B01 願偈大意

此願偈明何義？示現觀彼安樂世界，見阿彌陀如來，願生彼國土故。

## B02 起觀生信

有二：①示五念力，②出五念門。

## C01 示五念力

云何觀？云何生信心？

若善男子善女人，修五念門成就者，畢竟得生安樂國土，見彼阿彌陀佛。

## C02 出五念門

何等五念門？

一者禮拜門，二者讚歎門，三者作願門，四者觀察門，五者迴向門。

門者，入出義也。如人得門，則入出無礙。

前四念是入安樂淨土門，後一念是出慈悲教化門。

### D01 禮拜門

云何禮拜？身業禮拜阿彌陀，如來．應．正遍知。

諸佛如來，德有無量。德無量故，德號亦無量。若欲具談，紙筆不能載也。是以諸經，或舉十名，或騰三號，蓋存至宗而已，豈此盡耶！所言三號，即此如來．應．正遍知也。

如來者，如法相解，如法相說。如諸佛安穩道來，此佛亦如是來，更不去後有中，故名如來。

應者，應供也。佛結使除盡，得一切智慧，應受一切天地眾生供養，故曰應也。

正遍知者，知一切諸法，實不壞相，不增不減。云何不壞？心行處滅，言語道斷，諸法如涅槃相不動，故名正遍知。

無礙光義，如前偈中解。

為生彼國意故。

何故言此？菩薩之法，常以晝三時、夜三時，禮十方一切諸佛，不必有願生意。今應當作願生意，故禮阿彌陀如來也。

## D02 讚歎門

云何讚歎？口業讚歎。

讚者，讚揚也。歎者，歌歎也。讚歎，非口不宣，故曰口業也。

稱彼如來名，如彼如來光明智相。如彼名義，欲如實修行相應故。

稱彼如來名者，謂稱無礙光如來名也。

如彼如來光明智相者，佛光明是智慧相也。此光明照十方世界，無有障礙。能除十方世界眾生無明黑闇。非如日月珠光，但破空室中闇也。

如彼名義欲如實修行相應者，彼無礙光如來名號，能破眾生一切無明，能滿眾生一切志願。

然，有稱名憶念，而無明猶在，而不滿所願者。何者？由不如實修行，與名義不相應故也。

云何為不如實修行與名義不相應？謂不知如來是實相身？是為物身？

又，有三種不相應：①信心不淳，若存若亡故。②信心不一，無決定故。③信心不相續，餘念間故。此三句，展轉相成。以信心不淳，故無決定。無決定故，念不相續。亦可念不相續故，不得決定信。不得決定信，故心不淳。與此相違，名如實修行相應。是故論主建言：我一心。

⑩名，為法指，如指指月。若稱佛名號，便得滿願者，指月之指，應能破闇。

若指月之指不能破闇，稱佛名號，亦何能滿願耶？

⑪答諸法萬差，不可一概。有名即法，有名異法。名即法者，諸佛菩薩名號，般若波羅蜜及陀羅尼章句禁呪音辭等是也。

如《禁腫辭》云：日出東方，乍赤乍黃等句。假使酉亥行禁，不關日出，而腫得瘥。

亦如行師對陣，但一切齒中，誦「臨兵鬥者皆陳列在前」，行誦此九字，五兵之所不中，《抱朴子》謂之要道者也。

又，苦轉筋者，以木瓜對火，熨之則愈。復有人但呼木瓜名亦愈，吾身得其效也。

如斯近事，世間共知，況不可思議境界者乎！滅除藥塗鼓之喻，復是一事。此喻已彰於前，故不重引。

有名異法者，如指指月等名也。

### D03 作願門

云何作願？心常作願，一心專念，畢竟往生安樂國土，欲如實修行奢摩他故。

譯奢摩他曰止，止者，止心一處，不作惡也。此譯名，乃不乖大意，於義未滿。何以言之？如止心鼻端，亦名為止。不淨觀止貪，慈悲觀止瞋，因緣觀止癡，如是等亦名為止。如人將行不行，亦名為止。是知止語浮漫不正，得奢摩他名也。如椿、蔗、榆、柳，雖皆名木，若但云木，安得榆、柳耶？

奢摩他，云止者，今有三義：

①一心專念阿彌陀如來，願生彼土。此如來名號，及彼國土名號，能止一切惡。

②彼安樂土，過三界道。若人一生彼國，自然止身口意惡。

③阿彌陀如來，正覺住持力，自然止求聲聞辟支佛心。

此三種止，從如來如實功德生。是故言：欲如實修行奢摩他故。

## D04 觀察門

云何觀察？智慧觀察，正念觀彼，欲如實修行毘婆舍那故。

譯毘婆舍那曰觀，但汎言觀，義亦未滿。何以言之？如觀身無常、苦、空、無我、九相等，皆名為觀。亦如上木名，不得椿、蔗也。

毘婆舍那，云觀者，亦有二義：

①在此作想，觀彼三種莊嚴功德。此功德如實，故修行者亦得如實功德。如實功德者，決定得生彼土。

②亦得生彼淨土，即見阿彌陀佛。未證淨心菩薩，畢竟得證平等法身。與淨心菩薩，與上地菩薩畢竟同得寂滅平等。

是故言：欲如實修行毘婆奢那故。

彼觀察有三種，何等三種？一者觀察彼佛國土莊嚴功德，二者觀察阿彌陀佛莊嚴功德，三者觀察彼諸菩薩莊嚴功德。

心緣其事，曰觀。觀心分明，曰察。

### D05 迴向門

云何迴向？不捨一切苦惱眾生，心常作願，迴向為首，得成就大悲心故。

迴向有二種相：①往相，②還相。

往相者，以己功德，迴施一切眾生，作願共往生彼阿彌陀如來安樂淨土。

還相者，生彼土已，得奢摩他、毘婆舍那方便力成就，迴入生死稠林，教化一切眾生，共向佛道。

若往若還，皆為拔眾生渡生死海。是故言迴向為首，得成就大悲心故。

## B03 觀行體相

有二：①器體，②眾生體。

### C01 器體

器體有三：①國土體相，②示現自利利他，③入第一義諦。

### D01 國土體相

云何觀察彼佛國土莊嚴功德？

彼佛國土莊嚴功德者，成就不可思議力故。如彼摩尼如意寶性，相似相對法故。

不可思議力者，總指彼佛國土十七種莊嚴功德力不可得思議也。

諸經統言，有五種不可思議：①眾生多少，不可思議。②業力，不可思議。

③龍力，不可思議。④禪定力，不可思議。⑤佛法力，不可思議。

此中，佛土不可思議，有二種力：①業力。謂法藏菩薩出世善根，大願業力所成。②正覺阿彌陀法王，善住持力所攝。

此不可思議，如下十七種，一一相皆不可思議，至文當釋。

如彼摩尼如意寶性相似相對者，借彼摩尼如意寶性，示安樂佛土不可思議性也。諸佛入涅槃時，以方便力，留碎身舍利，以福眾生。眾生福盡，此舍利變為摩尼如意寶珠，此珠多在大海中，大龍王以為首飾。若轉輪聖王出世，以慈悲方便，能得此珠，於閻浮提作大饒益，若須衣服、飲食、燈明、樂具，隨意所欲種種物時，王便潔齋，置珠於長竿頭，發願言：若我實是轉輪王者，願寶珠雨如此之物，若遍一里，若十里，若百里，隨我心願。爾時即便於虛空中雨

種種物，皆稱所須，滿足天下一切人願。以此寶性力故，彼安樂佛土亦如是，以安樂性種種成就故。

相似相對者，彼寶珠力求衣食者，能雨衣食等物，稱求者意，非是不求。彼佛土則不然，性滿足成就故，無所乏少。片取彼性為喻，故言相似相對。

又，彼寶但能與眾生衣食等願，不能與眾生無上道願。

又，彼寶但能與眾生一身願，不能與眾生無量身願。

有如是等無量差別，故言相似。

觀察彼佛國土莊嚴功德成就者，有十七種應知。何等十七：

- ①莊嚴清淨功德成就，
- ②莊嚴量功德成就，
- ③莊嚴性功德成就，
- ④莊嚴形相功德成就，
- ⑤莊嚴種種事功德成就，
- ⑥莊嚴妙色功德成就，

- ⑦莊嚴觸功德成就，      ⑧莊嚴三種功德成就，      ⑨莊嚴雨功德成就，  
⑩莊嚴光明功德成就，      ⑪莊嚴妙聲功德成就，      ⑫莊嚴主功德成就，  
⑬莊嚴眷屬功德成就，      ⑭莊嚴受用功德成就，      ⑮莊嚴無諸難功德成就，  
⑯莊嚴大義門功德成就， ⑰莊嚴一切所求滿足功德成就

先舉章門，次續提釋。

### E01 莊嚴清淨功德成就

莊嚴清淨功德成就者，偈言：「觀彼世界相 勝過三界道」故。

此云何不思議？

有凡夫人，煩惱成就，亦得生彼淨土。三界繫業畢竟不牽，則是不斷煩惱，得涅槃分，焉可思議。

## E02 莊嚴量功德成就

莊嚴量功德成就者，偈言：「究竟如虛空 廣大無邊際」故。

此云何不思議？

彼國人天，若意欲宮殿樓閣，若廣一由旬，若百由旬，若千由旬，千間萬間，隨心所成，人各如此。

又，十方世界眾生願往生者，若已生、若今生、若當生，一時一日之頃，算數所不能知其多少，而彼世界常若虛空，無迫迮相。彼中眾生住如此量中，志願廣大，亦如虛空無有限量。彼國土量，能成眾生心行量，何可思議。

## E03 莊嚴性功德成就

莊嚴性功德成就者，偈言：「正道大慈悲 出世善根生」故。

此云何不思議？

譬如迦羅求羅蟲，其形微小，若得大風，身如大山。隨風大小，為己身相。生安樂國眾生，亦復如是。生彼正道世界，即成就出世善根，入正定聚。亦如彼風，非身而身，焉可思議。

#### E04 莊嚴形相功德成就

莊嚴形相功德成就者，偈言：「淨光明滿足 如鏡日月輪」故。

此云何不思議？

夫忍辱得端正，我心影嚮也。一得生彼，無瞋忍之殊。人天色像，平等妙絕，蓋淨光之力也。彼光非心行，而為心行之事，焉可思議。

#### E05 莊嚴種種事功德成就

莊嚴種種事功德成就者，偈言：「備諸珍寶性 具足妙莊嚴」故。

此云何不思議？

彼種種事，或一寶十寶，百千種寶，隨心稱意，無不具足。若欲令無，倏焉化沒。心得自在，有逾神通，安可思議。

### E06 莊嚴妙色功德成就

莊嚴妙色功德成就者，偈言：「無垢光焰熾 明淨曜世間」故。

此云何不思議？

其光曜事，則映徹表裏。其光曜心，則終盡無明。光為佛事，焉可思議。

### E07 莊嚴觸功德成就

莊嚴觸功德成就者，偈言：「寶性功德草 柔軟左右旋 觸者生勝樂 過迦

旃隣陀」故。

此云何不思議？

夫寶例堅強，而此柔軟。觸樂應著，而此增道。事同愛作，何可思議。

有菩薩字愛作，形容端正，生人染著<sup>49</sup>。經言：染之者，或生天上，或發菩

---

49 《大寶積經·大乘方便會》。爾時有菩薩名曰愛作，入舍衛城次第乞食，漸漸遂至一長者家。長者有女名曰德增，住高樓上。彼時女人聞菩薩聲，尋持食出，向愛作菩薩。女見菩薩取其形容相好音聲，欲心即起，為欲所燒，即時命終，骨節解散。愛作菩薩見德增女，亦起惡覺姪欲之心。于時愛作菩薩即自思惟：「云何彼法？法者為著。云何彼眼？何者此眼？眼性非知，但是肉團，不愛不知、不思不覺、無所分別、其性本空。耳鼻舌身意法亦復如是。」薄皮厚皮、血肉脂肪、髮毛爪齒、骨髓筋脈，從足至頂如是觀已，若內若外，無有一法而可愛著、若瞋若癡。於一切法如實觀，即離欲心，得無生忍。是愛作菩薩因起欲心推求諸法，即壞魔眾當轉法輪。時，德增女命終之後生三十三天，轉于女身，得成男子，自然處於七寶宮殿，縱廣正等十二由旬，有萬四千諸天姪女以為侍衛。愛作菩薩數數發願：女人見我，若發欲心，尋時得離於女人身，得成男子，為人所尊。

提心。

## E08 莊嚴三種功德成就

莊嚴三種功德成就者，有三種事應知。何等三種：①水，②地，③虛空。

此三種所以并言者，以同類故也。何以言之？

①六大類。所謂虛空、識、地、水、火、風。

②無分別類。所謂地水火風虛空。

③但言三類者：識一大，屬眾生世間故。火一大，彼中無故。雖有風，風不可見故，無住處故。

是以六大，五類中，取有而可莊嚴三種并言之。

## F01 莊嚴水功德成就

莊嚴水功德成就者，偈言：「寶花千萬種 彌覆池流泉 微風動花葉 交錯光亂轉」故。

此云何不思議？

彼淨土人天，非水穀身，何須水耶？

清淨成就，不須洗濯，復何用水耶？

彼中無四時，常調適，不煩熱，復何須水耶？

不須而有，當有所以。

《佛說無量壽經》言：彼諸菩薩及聲聞，若入寶池，意欲令水沒足，水即沒足；欲令至膝，水即至膝；欲令至腰，水即至腰；欲令至頸，水即至頸；欲令灌身，自然濯身；欲令還復，水輒還復。調和冷煖，自然隨意。開神悅體，蕩

除心垢。清明澄潔，淨若無形。寶沙映徹，無深不照。微瀾迴流，轉相灌注。安詳徐逝，不遲不疾；波揚無量，自然妙聲，隨其所應，莫不聞者。或聞佛聲，或聞法聲，或聞僧聲，或聞寂靜聲，空無我聲，大慈悲聲，波羅蜜聲。或聞十力、無畏、不共法聲，諸通慧聲，無所作聲，不起滅聲，無生忍聲，乃至甘露灌頂，眾妙法聲。如是等聲，稱其所聞，歡喜無量。隨順清淨離欲寂滅真實之義，隨順三寶、力、無所畏、不共之法，隨順通慧菩薩聲聞所行之道。無有三途苦難之名，但有自然快樂之音。是故其國名曰安樂。

此水為佛事，安可思議。

## F02 莊嚴地功德成就

莊嚴地功德成就者，偈言：「宮殿諸樓閣 觀十方無礙 雜樹異光色 寶欄

遍圍遶」故。

此云何不思議？

彼種種事，或一寶十寶，百寶無量寶，隨心稱意，莊嚴具足此莊嚴事。

如淨明鏡，十方國土淨穢諸相，善惡業緣，一切悉現。彼中人天見斯事故，探湯不及之情<sup>50</sup>，自然成就。

亦如諸大菩薩，以照法性等寶為冠。此寶冠中，皆見諸佛。

又，了達一切諸法之性。

又，如佛說《法華經》時，放眉間光，照于東方萬八千土，皆如金色；從阿

---

<sup>50</sup> 比喻心存戒懼。《論語·季氏》：見善如不及，見不善如探湯。

鼻獄，上至有頂，諸世界中六道眾生，生死所趣，善惡業緣，受報好醜，於此悉見。

蓋斯類也。此影為佛事，安可思議。

### F03 莊嚴虛空功德成就

莊嚴虛空功德成就者，偈言：「無量寶交絡 羅網遍虛空 種種鈴發響 宣吐妙法音」故。

此云何不思議？

《佛說無量壽經》言：無量寶網彌覆佛土，皆以金縷、真珠、百千雜寶、奇妙珍異，莊嚴校飾。周匝四面，垂以寶鈴。光色晃耀，盡極嚴麗。自然德風徐起微動，其風調和，不寒不暑，溫涼柔軟，不遲不疾，吹諸羅網及眾寶樹，演

發無量微妙法音，流布萬種，溫雅德香。其有聞者，塵勞垢習自然不起。風觸其身，皆得快樂。此聲為佛事，焉可思議。

### E09 莊嚴雨功德成就

莊嚴雨功德成就者，偈言：「雨花衣莊嚴 無量香普薰」故。

此云何不思議？

《佛說無量壽經》言：風吹散花，遍滿佛土。隨色次第，而不雜亂。柔軟光澤，馨香芬烈。足履其上，陷下四寸。隨舉足已，還復如故。花用已訖，地輒開裂，以次化沒，清淨無遺。隨其時節，風吹散花，如是六返。又，眾寶蓮花周滿世界，一一寶花，百千億葉。其花光明，無量種色，青色青光，白色白光，玄黃朱紫，光色赫然。晔晔煥爛，明曜日月。一一花中，出三十六百千億

光。一一光中，出三十六百千億佛，身色紫金，相好殊特。一一諸佛，又放百千光明，普為十方說微妙法。如是諸佛，各各安立無量眾生於佛正道。花為佛事，安可思議。

### E10 莊嚴光明功德成就

莊嚴光明功德成就者，偈言：「佛慧明淨日 除世癡闇冥」故。

此云何不思議？

彼土光明，從如來智慧報起。觸之者，無明黑闇終必消除。光明非慧，能為慧用，焉可思議。

### E11 莊嚴妙聲功德成就

莊嚴妙聲功德成就者，偈言：「梵聲悟深遠 微妙聞十方」故。

此云何不思議？

經言：若人但聞彼國土清淨安樂，克念<sup>51</sup>願生，亦得往生，則入正定聚。此是國土名字為佛事，安可思議。

## E12 莊嚴主功德成就

莊嚴主功德成就者，偈言：「正覺阿彌陀 法王善住持」故。

此云何不思議？

正覺阿彌陀，不可思議。彼安樂淨土，為正覺阿彌陀善力住持，云何可得思

---

51 《尚書》：惟聖罔念作狂，惟狂克念作聖。人人都有聖明的本性，一旦妄念生起，且相續不斷，則被煩惱纏縛，就會變成凡夫；凡夫克制妄念，保持正念，就會變成聖人。由此可知，「聖」與「狂」之分，只在罔念與克念之間。

議耶？

住，名不異不滅。持，名不散不失。如以不朽藥<sup>52</sup>塗種子，在水不瀾，在火不燄，得因緣則生。何以故？不朽藥力故。若人一生安樂淨土，後時意願生三界教化眾生，捨淨土命，隨願得生。雖生三界，雜生水火中，無上菩提種子畢竟不朽。何以故？以經正覺阿彌陀善住持故。

### E13 莊嚴眷屬功德成就

莊嚴眷屬功德成就者，偈言：「如來淨花眾 正覺花化生」故。

---

52 《大般涅槃經》：善男子！雪山之中，有上香藥，名曰娑呵。有人見之，得壽無量，無有病苦。雖有四毒，不能中傷。若有觸者，增長壽命滿百二十。若有念者，得宿命智。何以故？藥勢力故。諸佛菩薩亦復如是，若有見者，即得斷除一切煩惱。雖有四魔，不能干亂。若有觸者，命不可夭、不生不死、不退不沒。所謂觸者，若在佛邊聽受妙法。若有念者，得阿耨多羅三藐三菩提。

此云何不思議？

凡是雜生世界，若胎若卵若濕若化，眷屬若干，苦樂萬品，以雜業故。彼安樂國土，莫非是阿彌陀如來正覺淨花之所化生。同一念佛，無別道故。遠通夫四海之內，皆為兄弟也。眷屬無量，焉可思議。

#### E14 莊嚴受用功德成就

莊嚴受用功德成就者，偈言：「愛樂佛法味 禪三昧為食」故。

此云何不思議？

不食而資命，蓋所資有以也，豈不是如來滿本願乎！乘佛願為我命，焉可思議。

#### E15 莊嚴無諸難功德成就

莊嚴無諸難功德成就者，偈言：「永離身心惱 受樂常無間」故。

此云何不思議？

經言：身為苦器，心為惱端，而彼有身有心而受樂無間，安可思議。

### E16 莊嚴大義門功德成就

莊嚴大義門功德成就者，偈言：「大乘善根界 等無譏嫌名 女人及根缺 二乘種不生」故。

淨土果報，離二種譏嫌過，應知：①體，②名。

體有三種：二乘人、女人、諸根不具人。無此三過，故名離體譏嫌。

名亦有三種：非但無三體，乃至不聞二乘、女人、諸根不具三種名，故名離名譏嫌。等者，平等一相故。

此云何不思議？

夫諸天共器，飯有隨福之色；足指按地，乃詳金礫之旨<sup>53</sup>。而願往生者，本則三三之品。今無一二之殊，亦如淄澠一味<sup>54</sup>，焉可思議。

## E17 莊嚴一切所求滿足功德成就

---

53 《維摩詰所說經》：舍利弗言：「我見此土丘陵坑坎、荊棘沙礫、土石諸山、穢惡充滿。」

螺髻梵王言：「仁者心有高下，不依佛慧，故見此土為不淨耳！舍利弗！菩薩於一切眾生，悉皆平等，深心清淨，依佛智慧，則能見此佛土清淨。」

於是佛以足指按地，即時三千大千世界，若干百千珍寶嚴飾，譬如寶莊嚴佛無量功德寶莊嚴土，一切大眾歎未曾有！而皆自見坐寶蓮花。佛告舍利弗：「汝且觀是佛土嚴淨？」

舍利弗言：「唯然，世尊！本所不見，本所不聞，今佛國土嚴淨悉現。」

佛語舍利弗：「我佛國土常淨若此，為欲度斯下劣人故，示是眾惡不淨土耳！譬如諸天，共寶器食，隨其福德，飯色有異。如是，舍利弗！若人心淨，便見此土功德莊嚴。」

54 淄水、澠水，在山東境內。水入大海，則同一味，不得辨別。

莊嚴一切所求滿足功德成就者，偈言：眾生所願樂，一切能滿足故。

此云何不思議？

彼國人天，若欲願往他方世界無量佛刹，供養諸佛菩薩，及所須供養之具，無不稱願。

又，欲捨彼壽命，向餘國生，修短自在，隨願皆得。

未階自在之位，而同自在之用，焉可思議。

## D02 示現自利利他

略說彼阿彌陀佛國土十七種莊嚴功德成就，示現如來自身利益大功德力成就，利益他功德成就故。

言略者，彰彼淨土功德無量，非唯十七種也。

夫須彌之入芥子，毛孔之納大海<sup>55</sup>，豈山海之神乎！毛芥之力乎？能神者神之耳。是故十七種雖曰利他，自利之義炳然，可知。

### D03 入第一義諦

彼無量壽佛國土莊嚴，第一義諦妙境界相十六句，及一句次第說，應知。

第一義諦者，佛因緣法也。此諦是境義。

是故莊嚴等十六句，稱為妙境界相。此義至入一法句，文當更解釋。

及一句次第者，謂觀器淨等。總別十七句觀行次第也。

云何起次？建章言：歸命無礙光如來，願生安樂國。

---

55 《維摩詰所說經》。

此中有疑。疑言：生為有本，眾累之元。棄生願生，生何可盡。

為釋此疑，是故觀彼淨土莊嚴功德成就，明彼淨土是阿彌陀如來清淨本願無生之生，非如三有虛妄生也。何以言之？

夫法性清淨，畢竟無生。言生者，是得生者之情耳。生苟無生，生何所盡？

盡夫生者，上失無為能為之身，下酬<sup>56</sup>三空不空之痼<sup>57</sup>。根敗永亡，號振三千。無反無復，於斯招恥。

體夫生理，謂之淨土。淨土之宅，所謂十七句是也。

十七句中，總別為二：

---

56 醉。

57 廢也，病也。

初句是總相，所謂是清淨佛土，過三界道。

彼過三界有何相？下十六種莊嚴功德成就相是也。

①量。究竟如虛空，廣大無邊際故。

②既知量，此量以何為本？是故觀性。性，是本義。彼淨土從正道大慈悲、出世善根生。

③既言出世善根，此善根生何等相？是故，次觀莊嚴形相。

④既知形相，宜知形相何等體。是故，次觀種種事。

⑤既知種種事，宜知種種事妙色。是故，次觀妙色。

⑥既知妙色，此色有何觸？是故，次觀觸。

⑦既知身觸，應知眼觸。是故，次觀水、地、虛空莊嚴三事。

- ⑧既知眼觸，應知鼻觸。是故，次觀衣花香薰。
- ⑨既知眼鼻等觸，須知離染。是故，次觀佛慧明照。
- ⑩既知慧光淨力，宜知聲名遠近。是故，次觀梵聲遠聞。
- ⑪既知聲名，宜知誰為增上。是故，次觀主。
- ⑫既知有主，誰為主眷屬。是故，次觀眷屬。
- ⑬既知眷屬，宜知此眷屬若為受用。是故，次觀受用。
- ⑭既知受用，宜知此受用有難無難。是故，次觀無諸難。
- ⑮既知無諸難，以何義故無諸難。是故，次觀大義門。
- ⑯既知大義門，宜知大義門滿不滿。是故，次觀所求滿足。

復次，此十七句非但釋疑，觀此十七種莊嚴成就，能生真實淨信，必定得生

彼安樂佛土。

⑩上言知生無生，當是上品生者。若下下品人，乘十念往生，豈非取實生耶？

但取實生，即墮二執：①恐不得往生，②恐更生生惑。

⑪譬如淨摩尼珠置之濁水，水即清淨。若人雖有無量生死之罪濁，聞彼阿彌陀

如來至極無生清淨寶珠名號，投之濁心，念念之中，罪滅心淨，即得往生。

又，是摩尼珠以玄黃幣<sup>58</sup>裹，投之於水，水即玄黃，一如物色<sup>59</sup>。彼清淨佛土有阿彌陀如來無上寶珠，以無量莊嚴功德成就帛裹，投之於所往生者心水，豈不能轉生現為無生智乎！

---

58 幣，帛也，絲織品。

59 《摩訶般若波羅蜜經》。

又，如冰上燃火，火猛則冰解，冰解則火滅。彼下品人雖不知法性無生，但以稱佛名力，作往生意，願生彼土。彼土是無生界，現生之火自然而滅。

## C02 眾生體

眾生體者，此分中有二重：①觀佛，②觀菩薩。

### D01 觀佛

云何觀佛莊嚴功德成就？

觀佛莊嚴功德成就者，有八種，應知。

此觀義已彰前偈。

何等八種：

①莊嚴座功德成就，

- ②莊嚴身業功德成就，
- ③莊嚴口業功德成就，
- ④莊嚴心業功德成就，
- ⑤莊嚴眾功德成就，
- ⑥莊嚴上首功德成就，
- ⑦莊嚴主功德成就，
- ⑧莊嚴不虛作住持功德成就。

### E01 莊嚴座功德成就

何者莊嚴座功德成就？偈言：「無量大寶王 微妙淨花臺」故。

若欲觀座，當依《觀無量壽經》。

## E02 莊嚴身業功德成就

何者莊嚴身業功德成就？偈言：「相好光一尋 色像超群生」故。  
若欲觀佛身，當依《觀無量壽經》。

## E03 莊嚴口業功德成就

何者莊嚴口業功德成就？偈言：「如來微妙聲 梵響聞十方」故。

## E04 莊嚴心業功德成就

何者莊嚴心業功德成就？偈言：「同地水火風 虛空無分別」故。  
無分別者，無分別心故。

凡夫眾生，以身口意三業造罪，輪轉三界，無有窮已。是故諸佛菩薩莊嚴身口意三業，用治眾生虛誑三業也。

云何用治？眾生以身見故，受三途身、卑賤身、醜陋身、八難身、流轉身，如是等。眾生見阿彌陀如來相好光明身者，如上種種身業繫縛，皆得解脫。入如來家，畢竟得平等身業。

眾生以憍慢故，誹謗正法、毀訾賢聖，捐庠尊長<sup>60</sup>。如是之人應受拔舌苦、瘡痍苦、言教不行苦、無名聞苦，如是等種種諸苦。眾生聞阿彌陀如來至德名號說法音聲，如上種種口業繫縛，皆得解脫，入如來家，畢竟得平等口業。

眾生以邪見故，心生分別，若有若無，若非若是，若好若醜，若善若惡，若彼若此，有如是等種種分別。以分別故，長淪三有，受種種分別苦、取捨苦，

---

<sup>60</sup> 尊者，君父師也。長者，有德之人及兄黨也。

長寢大夜，無有出期。是眾生，若遇阿彌陀如來平等光照，若聞阿彌陀如來平等意業，是等眾生，如上種種意業繫縛，皆得解脫，入如來家，畢竟得平等意業。

⑩心是覺知相，云何可得同地水火風無分別耶？

⑪心雖知相，入實相則無知也。譬如蛇性雖曲，入竹筒則直。

又，如人身若針刺，若蜂螫，則有覺知。若石蛭啖，若甘刀割，則無覺知。

如是等有知無知，在于因緣。若在因緣，則非知非無知也。

⑫心入實相，可令無知。云何得有一切種智耶？

⑬凡心有知，則有所不知。聖心無知，故無所不知。無知而知，知即無知也。

⑭既言無知故無所不知。若無所不知者，豈不是知種種法耶？既知種種之法，

復云何言無所分別耶？

⑧諸法種種相，皆如幻化。然，幻化象馬，非無長頸鼻手之異，而智者觀之，豈言定有象馬分別之耶！

E05 莊嚴眾功德成就

何者莊嚴眾功德成就？偈言：「天人不動眾 清淨智海生」故。

E06 莊嚴上首功德成就

何者莊嚴上首功德成就？偈言：「如須彌山王 勝妙無過者」故。

E07 莊嚴主功德成就

何者莊嚴主功德成就？偈言：「天人丈夫眾 恭敬繞瞻仰」故。

E08 莊嚴不虛作住持功德成就

何者莊嚴不虛作住持功德成就？偈言：「觀佛本願力 遇無空過者 能令速滿足 功德大寶海」故。

不虛作住持功德成就者，蓋是阿彌陀如來本願力也。

今當略示虛作之相不能住持，用顯彼不虛作住持之義。人有輟餐養士<sup>61</sup>，或衅起舟中<sup>62</sup>；積金盈庫，而不免餓死<sup>63</sup>。如斯之事，觸目皆是。得，非作得；在，非守在。皆由虛妄業作，不能住持也。

所言不虛作住持者，依本法藏菩薩四十八願，今日阿彌陀如來自在神力，願

---

61 《吳越春秋》。

62 《呂氏春秋》。

63 《前漢書》。

以成力，力以就願。願不徒然，力不虛設。力願相符，畢竟不差，故曰成就。

即見彼佛，未證淨心菩薩，畢竟得證平等法身，與淨心菩薩與上地諸菩薩，畢竟同得寂滅平等故。

平等法身者，八地已上法性生身菩薩也。

寂滅平等者，即此法身菩薩所證寂滅平等之法也。以得此寂滅平等法，故名為平等法身。以平等法身菩薩所得，故名為寂滅平等法也。

此菩薩得報生三昧，以三昧神力，能一處、一念、一時，遍十方世界，種種供養一切諸佛及諸佛大會眾海。能於無量世界，無佛法僧處，種種示現種種教化，度脫一切眾生，常作佛事。初無往來想、供養想、度脫想，是故此身名為平等法身，此法名為寂滅平等法也。

未證淨心菩薩者，初地已上七地已還諸菩薩也。此菩薩亦能現身，若百若千若萬若億若百千萬億無佛國土，施作佛事。要須作心入三昧乃能，非不作心。以作心故，名為未得淨心。

此菩薩願生安樂淨土，即見阿彌陀佛。見阿彌陀佛時，與上地諸菩薩畢竟身等法等。龍樹菩薩、婆藪槃頭菩薩輩，願生彼者，當為此耳。

①問案《十地經》，菩薩進趣階級，漸有無量功勳，經多劫數，然後乃得。此云

何見阿彌陀佛時，畢竟與上地諸菩薩身等法等耶？

②答言畢竟者，未言即等也。畢竟，不失此等，故言等耳。

③問若不即等，復何待言？菩薩但登初地，以漸增進，自然當與佛等，何假言與上地菩薩等？

⑧菩薩於七地中得大寂滅，上不見諸佛可求，下不見眾生可度。欲捨佛道，證於實際。爾時，若不得十方諸佛神力加勸，即便滅度，與二乘無異。菩薩若往生安樂國，見阿彌陀佛，即無此難。是故，須言畢竟平等。

復次，《無量壽經》中，阿彌陀如來本願，言：「設我得佛，他方佛土諸菩薩眾來生我國，究竟必至一生補處，除其本願，自在所化。為眾生故，被弘誓鎧，積累德本，度脫一切，遊諸佛國，修菩薩行，供養十方諸佛如來，開化恒沙無量眾生，使立無上正真之道，超出常倫諸地之行，現前修習普賢之德。若不爾者，不取正覺。」案此經推，彼國菩薩，或可不從一地至一地。言十地階次者，是釋迦如來於閻浮提，一應化道耳。他方淨土，何必如此。五種不思議中，佛法最不可思議。若言菩薩必從一地至一地，無超越之理，

未敢詳也。譬如有樹，名曰好堅，是樹地生，百歲乃具。一日長高百丈，日日如此，計百歲之長，豈類修松耶！見松生長，日不過寸。聞彼好堅，何能不疑。即同有人聞「釋迦如來證阿羅漢於一聽，制無生於終朝。」謂是接誘之言，非稱實之說。聞此論事，亦當不信。夫非常之言，不入常人之耳。謂之不然，亦其宜也。

略說八句，示現如來自利利他功德莊嚴次第成就，應知。

此云何次第？前十七句是莊嚴國土功德成就。

既知國土相，應知國土之主。是故，次觀佛莊嚴功德。

彼佛若為莊嚴，於何處坐。是故，先觀座。

既知座已，宜知座主。是故，次觀佛莊嚴身業。

既知身業，應知有何聲名。是故，次觀佛莊嚴口業。

既知名聞，宜知得名所以。是故，次觀莊嚴心業。

既知三業具足，應為人天大師，堪受化者是誰。是故，次觀大眾功德。

既知大眾有無量功德，宜知上首者誰。是故，次觀上首，上首是佛。

既知上首，恐同長幼。是故，觀主。

既知是主，主有何增上。是故，次觀莊嚴不虛作住持。

八句次第成已。

## D02 觀菩薩

云何觀察菩薩莊嚴功德成就？

觀察菩薩莊嚴功德成就者，觀彼菩薩有四種正修行功德成就，應知。

真如，是諸法正體。體如而行，則是不行。不行而行，名如實修行。體唯一如，而義分為四。是故，四行，以一正統之。

何者為四？

### E01 開諸眾生淤泥花

一者於一佛土，身不動搖而遍十方種種應化，如實修行，常作佛事。

偈言：「安樂國清淨 常轉無垢輪 化佛菩薩日 如須彌住持」故。

開諸眾生淤泥花故。

八地以上菩薩，常在三昧。以三昧力，身不動本處，而能遍至十方，供養諸佛，教化眾生。

無垢輪者，佛地功德也。佛地功德，無習氣煩惱垢。佛為諸菩薩，常轉此法

輪。諸大菩薩，亦能以此法輪開導一切，無暫時休息。故言常轉。

法身如日，而應化身光遍諸世界也。言日未足，以明不動。

復言如須彌住持也。

淤泥花者，《維摩詰所說經》言：高原陸地，不生蓮花。卑濕淤泥，乃生蓮花。此喻凡夫在煩惱泥中，為菩薩開導，能生佛正覺花。諒夫紹隆三寶，常使不絕。

## E02 滅除一切眾生苦

二者彼應化身，一切時，不前不後，一心一念，放大光明，悉能遍至十方世界，教化眾生，種種方便修行所作，滅除一切眾生苦故。

偈言：「無垢莊嚴光 一念及一時 普照諸佛會 利益諸群生」故。

上言不動而至，容或至有前後。是故，復言：一念一時，無前後也。

### E03 供養恭敬讚歎諸佛如來功德

三者彼於一切世界無餘，照諸佛會大眾無餘，廣大無量，供養恭敬讚歎諸佛如來功德。

偈言：「雨天樂花衣 妙香等供養 讚諸佛功德 無有分別心」故。

無餘者，明遍至一切世界一切諸佛大會，無有一世界一佛會不至也。

肇公言：法身無像，而殊形並應。至韻無言，而玄籍彌布。冥權無謀，而動與事會。蓋斯意也。

### E04 住持莊嚴佛法僧寶功德大海

四者彼於十方一切世界，無三寶處，住持莊嚴佛法僧寶功德大海，遍示令

解，如實修行。

偈言：「何等世界無 佛法功德寶 我願皆往生 示佛法如佛」故。

上三句雖言遍至，皆是有佛國土。若無此句，便是法身有所不法，上善有所不善。

#### B04 淨入願心

又，向說觀察莊嚴佛土功德成就、莊嚴佛功德成就、莊嚴菩薩功德成就，此三種成就願心莊嚴，應知。

應知者，應知此三種莊嚴成就，由本四十八願等清淨願心之所莊嚴。因淨故果淨，非無因、他因有也。

略說入一法句故。

上國土莊嚴十七句，如來莊嚴八句，菩薩莊嚴四句，為廣。入一法句為略。

何故示現廣略相入？諸佛菩薩有二種法身：①法性法身，②方便法身。由法性法身，生方便法身。由方便法身，出法性法身。此二法身，異而不可分，一而不可同。是故，廣略相入，統以法名。

菩薩若不知廣略相入，則不能自利利他。

一法句者，謂清淨句。清淨句者，謂真實智慧、無為法身故。

此三句展轉相入。

依何義名之為法？以清淨故。

依何義名為清淨？以真實智慧、無為法身故。

真實智慧者，實相智慧也。實相無相故，真智無知也。

無為法身者，法性身也。法性寂滅故，法身無相也。無相故，能無不相。是故，相好莊嚴即法身也。

無知故，能無不知。是故，一切種智，即真實智慧也。以真實而曰智慧，明智慧非作、非非作也。以無為而標法身，明法身非色、非非色也。非於非者，豈非非之能是乎？蓋無非之，曰是也。自是無待，復非是也。非是、非非，百非之所不喻。是故，言清淨句。清淨句者，謂真實智慧、無為法身也。

此清淨有二種，應知。

上轉入句中，通一法入清淨，通清淨入法身。今將別清淨出二種故。故言應知。

何等二種？一者器世間清淨，二者眾生世間清淨。

器世間清淨者，如向說十七種莊嚴佛土功德成就，是名器世間清淨。

眾生世間清淨者，如向說八種莊嚴佛功德成就，四種莊嚴菩薩功德成就，是名眾生世間清淨。

如是一法句，攝二種清淨義，應知。

夫眾生為別報之體，國土為共報之用。體用不一，所以應知。然，諸法心成無餘境界，眾生及器復不得異、不得一。不一，則義分。不異，同清淨。

器者，用也。謂彼淨土是彼清淨眾生之所受用，故名為器。如淨食，用不淨器，以器不淨故，食亦不淨。不淨食，用淨器，食不淨故，器亦不淨。要二俱潔，乃得稱淨。是以一清淨名，必攝二種。

⑩言眾生清淨，則是佛與菩薩。彼諸人天得入此清淨數不？

⑧得名清淨，非實清淨。

譬如出家聖人，以殺煩惱賊故，名為比丘。凡夫出家者，持戒破戒，皆名比丘。

又，如灌頂王子，初生之時，具三十二相，即為七寶所屬。雖未能為轉輪王事，亦名轉輪王，以其必為轉輪王故。

彼諸人天亦復如是，皆入大乘正定之聚，畢竟當得清淨法身。以當得故，得名清淨。

### B05 善巧攝化

如是菩薩，奢摩他、毘婆舍那，廣略修行，成就柔軟心。

柔軟心者，謂廣略止觀，相順修行，成不二心也。譬如以水取影，清淨相資

而成就也。

如實知廣略諸法。

如實知者，如實相而知也。廣中二十九句，略中一句，莫非實相也。

如是成就巧方便迴向。

如是者，如前後廣略，皆實相也。

以知實相故，則知三界眾生虛妄相也。

知眾生虛妄，則生真實慈悲也。

知真實法身，則起真實歸依也。

慈悲之與歸依，巧方便在下。

何者菩薩巧方便迴向？菩薩巧方便迴向者，謂說禮拜等五種修行，所集一切

功德善根，不求自身住持之樂，欲拔一切眾生苦故，作願攝取一切眾生，共同生彼安樂佛國，是名菩薩巧方便迴向成就。

案王舍城所說《無量壽經》，三輩生中，雖行有優劣，莫不皆發無上菩提之心。此無上菩提心，即是願作佛心。願作佛心，即是度眾生心。度眾生心，即攝取眾生生有佛國土心。是故，願生彼安樂淨土者，要發無上菩提心也。若人不發無上菩提心，但聞彼國土受樂無間，為樂故願生，亦當不得往生也。

是故言：不求自身住持之樂，欲拔一切眾生苦故。

住持樂者，謂彼安樂淨土為阿彌陀如來本願力之所住持，受樂無間也。

凡釋迴向名義，謂以己所集一切功德，施與一切眾生，共向佛道。

巧方便者，謂菩薩願以己智慧火，燒一切眾生煩惱草木。

若有一眾生不成佛，我不作佛。而眾生未盡成佛，菩薩已自成佛。

譬如火椽<sup>64</sup>，欲摘<sup>65</sup>一切草木，燒令使盡。草木未盡，火椽已盡。

以後其身而身先，故名巧方便。此中言方便者，謂作願攝取一切眾生，共同生彼安樂佛國。

彼佛國即是畢竟成佛道路，無上方便也。

## B06 離菩提障

菩薩如是善知迴向成就，即能遠離三種菩提門相違法。何等三種？

---

64 同栝，音添，炊灶木，撥火棍。

65 音與義為別。《淮南子·齊俗訓》：柱不可以摘齒，筐不可以持屋，馬不可以服重，牛不可以追速，鉛不可以為刀，銅不可以為弩，鐵不可以為舟，木不可以為釜。

一者依智慧門，不求自樂，遠離我心貪著自身故。

知進守退，曰智。知空無我，曰慧。依智故，不求自樂。依慧故，遠離我心貪著自身。

二者依慈悲門，拔一切眾生苦，遠離無安眾生心故。

拔苦，曰慈。與樂，曰悲。依慈故，拔一切眾生苦。依悲故，遠離無安眾生心。

三者依方便門，憐愍一切眾生心，遠離供養恭敬自身心故。

正直，曰方。外己，曰便。依正直故，生憐愍一切眾生心。依外己故，遠離供養恭敬自身心。

是名遠離三種菩提門相違法。

## B07 順菩提門

菩薩遠離如是三種菩提門相違法，得三種隨順菩提門法滿足故。何等三種？

一者無染清淨心，以不為自身求諸樂故。

菩提，是無染清淨處。若為身求樂，即違菩提。是故，無染清淨心，是順菩提門。

二者安清淨心，以拔一切眾生苦故。

菩提，是安穩一切眾生清淨處。若不作心「拔一切眾生離生死苦」，即便違菩提。是故，拔一切眾生苦，是順菩提門。

三者樂清淨心，以令一切眾生得大菩提故，以攝取眾生生彼國土故。

菩提，是畢竟常樂處。若不令一切眾生得畢竟常樂，則違菩提。

此畢竟常樂依何而得？依大乘門。

大乘門者，謂彼安樂佛國土是也。是故，又言「以攝取眾生彼國土」故。

是名三種隨順菩提門法滿足，應知。

### B08 名義攝對

向說智慧、慈悲、方便，三種門攝取般若，般若攝取方便，應知。

般若者，達如之慧名。方便者，通權之智稱。達如則心行寂滅，通權則備省眾機。省機之智，備應而無知。寂滅之慧，亦無知而備省。然則智慧、方便，相緣而動，相緣而靜。動不失靜，智慧之功也。靜不廢動，方便之力也。是故智慧、慈悲、方便攝取般若，般若攝取方便。

應知者，謂應知智慧、方便，是菩薩父母。若不依智慧、方便，菩薩法則不

成就。何以故？若無智慧，為眾生時，則墮顛倒。若無方便，觀法性時，則證實際。是故應知。

向說遠離我心不貪著自身，遠離無安眾生心，遠離供養恭敬自身心，此三種法遠離障菩提心，應知。

諸法各有障礙相，如風能障靜，土能障水，濕能障火，五黑<sup>66</sup>十惡障人天，四顛倒障聲聞果。此中三種不遠離，障菩提心。

應知者，若欲得無障，當遠離此三種障礙也。

向說無染清淨心、安清淨心、樂清淨心，此三種心略一處成就妙樂勝真心，

---

66 不善業之異名。

應知。

樂有三種：

①外樂，謂五識所生樂。

②內樂，謂初禪二禪三禪意識所生樂。

③法樂樂，謂智慧所生樂。此智慧所生樂，從愛佛果功德起。

是遠離我心、遠離無安眾生心、遠離自供養心，是三種心清淨增進，略為妙樂勝真心。

妙，言其好，以此樂緣佛生故。勝，言勝出三界中樂。真，言不虛偽、不顛倒。

B09 願事成就

如是菩薩，智慧心、方便心、無障心、勝真心，能生清淨佛國土，應知。

應知者，謂應知此四種清淨功德，能得生彼清淨佛國土，非是他緣而生也。

是名菩薩摩訶薩隨順五種法門，所作隨意自在成就。

如向所說身業、口業、意業、智業、方便智業，隨順法門故。

隨意自在者，言此五種功德力，能生清淨佛土，出沒自在也。

身業者，禮拜也。口業者，讚歎也。意業者，作願也。智業者，觀察也。方便智業者，迴向也。言此五種業和合，則是隨順往生淨土法門自在業成就。

## B10 利行滿足

復有五種門，漸次成就五種功德，應知。

何者五門？一者近門，二者大會眾門，三者宅門，四者屋門，五者園林遊戲

地門。

此五種，示現入出次第相。

入相中，初至淨土，是近相。謂：入大乘正定聚，近阿耨多羅三藐三菩提。

入淨土已，便入如來大會眾數。

入眾數已，當至修行安心之宅。

入宅已，當至修行所居屋寓。

修行成就已，當至教化地。教化地，即是菩薩自娛樂地。是故，出門，稱園林遊戲地門。

此五種門，初四種門成就入功德，第五門成就出功德。

C01 自利行

此入出功德門，何者是？釋言：

### D01 近門

入第一門者，以禮拜阿彌陀佛，為生彼國故，得生安樂世界。是名入第一門。

禮佛、願生佛國，是初功德相。

### D02 大會眾門

入第二門者，以讚歎阿彌陀佛，隨順名義，稱如來名，依如來光明智相修行故，得入大會眾數，是名入第二門。

依如來名義讚歎，是第二功德相。

### D03 宅門

入第三門者，以一心專念，作願生彼，修奢摩他寂靜三昧行故，得入蓮花藏世界，是名入第三門。

為修寂靜止故，一心願生彼國，是第三功德相。

#### D04 屋門

入第四門者，以專念觀察彼妙莊嚴，修毘婆舍那故，得到彼處，受用種種法味樂，是名入第四門。

種種法味樂者，毘婆舍那中，有觀佛國土清淨味，攝受眾生大乘味，畢竟住持不虛作味，類事起行願取佛土味。

有如是等無量莊嚴佛道味，故言種種。是第四功德相。

#### C02 利他行 園林遊戲地門

出第五門者，以大慈悲，觀察一切苦惱眾生，示應化身，迴入生死園煩惱林中，遊戲神通，至教化地，以本願力迴向故，是名出第五門，

示應化身者，如《法花經》普門示現之類也。

遊戲有二義：

①自在義。菩薩度眾生，譬如獅子搏鹿，所為不難，如似遊戲。

②度無所度義。菩薩觀眾生畢竟無所有，雖度無量眾生，而實無一眾生得滅度者，示度眾生如似遊戲。

言本願力者，示大菩薩於法身中，常在三昧而現種種身，種種神通，種種說法，皆以本願力起。譬如阿修羅琴，雖無鼓者，而音曲自然。

是名教化地第五功德相。

### C03 速成佛道

菩薩入四種門，自利行成就，應知。

成就者，謂自利滿足也。

應知者，謂應知由自利故，則能利他，非是不能自利而能利他也。

菩薩出第五門，迴向利益他行成就，應知。

成就者，謂以迴向因，證教化地果。若因若果，無有一事不能利他。

應知者，謂應知由利他故，則能自利，非是不能利他而能自利也。

菩薩如是修五念門行，自利利他，速得成就阿耨多羅三藐三菩提故。

佛所得法，名為阿耨多羅三藐三菩提。以得此菩提，故名為佛。

今言速得阿耨多羅三藐三菩提，是得早作佛也。

阿，名無。耨多羅，名上。三藐，名正。三，名遍。菩提，名道。統而譯之名為無上正遍道。無上者，言此道，窮理盡性<sup>67</sup>，更無過者。何以言之？以正故。正者，聖智也。如法相而知，故稱為正知。法性無相，故聖智無知也。

遍有二種：

①聖心，遍知一切法。②法身，遍滿法界。若身若心，無不遍也。

道者，無礙道也。《花嚴經·菩薩問明品》言：一切無礙人，一道出生死。

一道者，一無礙道也。無礙者，謂知生死即是涅槃。

如是等入不二法門無礙相也。

---

67 《易經·說卦》：窮盡理性，以至於命。深入鑽研事理，得以受用，非紙上談兵也。

①問有何因緣，言速得成就阿耨多羅三藐三菩提？

②答論言：「修五門行，以自利利他成就故。」然，核求其本，阿彌陀如來為增上緣。他利之與利他，談有左右。若自佛而言，宜言利他。自眾生而言，宜言他利。今將談佛力，是故以利他言之。當知此意也。

凡是生彼淨土，及彼菩薩人天所起諸行，皆緣阿彌陀如來本願力故。何以言之？若非佛力四十八願，便是徒設。今的取三願，用證義意。

願言：「設我得佛，十方眾生，至心信樂，欲生我國，乃至十念，若不得生者，不取正覺，唯除五逆、誹謗正法。」緣佛願力故，十念念佛，便得往生。得往生故，即免三界輪轉之事。無輪轉故，所以得速。一證也。

願言：「設我得佛，國中人天，不住正定聚必至滅度者，不取正覺。」緣佛

願力故，住正定聚。住正定聚故，必至滅度，無諸迴復之難，所以得速。二證也。

願言：「設我得佛，他方佛土諸菩薩眾，來生我國，究竟必至一生補處，除其本願自在所化，為眾生故，被弘誓鎧，積累德本，度脫一切，遊諸佛國，修菩薩行，供養十方諸佛如來，開化恒沙無量眾生，使立無上正真之道，超出常倫諸地之行，現前修習普賢之德。若不爾者，不取正覺。」緣佛願力故，超出常倫諸地之行，現前修習普賢之德。以超出常倫諸地行故，所以得速。三證也。

以斯而推，他力為增上緣，得不然乎！

當復引例，示自力他力相。

如人畏三途故，受持禁戒。受持禁戒故，能修禪定。以禪定故，修習神通。以神通故，能遊四天下。如是等名為自力。

又，如劣夫跨驢不上。從轉輪王行，便乘虛空，遊四天下，無所障礙。如是等，名為他力。

愚哉！後之學者，聞他力可乘，當生信心，勿自局分也。

無量壽修多羅優婆提舍願生偈，略解義竟。

經始稱如是，彰信為能入。末言奉行，表服膺事已。

論初歸禮，明宗旨有由。終云義竟，示所詮理畢。述作人殊，於茲成例。

無量壽經優婆提舍願生偈註

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>